



五代史記序

建安陳師錫撰



孟子曰三代之得天下也以仁其失天下也以不仁自生
民以來一治一亂旋相消長未有去仁而興積仁而亡者
甚哉五代不仁之極也其禍敗之復殄滅剝喪之威亦其
效耳夫國之所以存者以有民民之所以生者以有君方
是時上之人以慘烈自任刑戮相高兵革不休夷滅當禡
置君猶易吏變國若傳舍生民膏血塗草野骸骼暴原隰
君民相昧如髮鬻草木幾何其不胥為夷也遠皇天悔禍
真人出寧易暴以仁轉禍以德民咸保其首領收其族屬

各正性命豈非天邪方夷夏相蹂兵連亂結非無忠良豪傑之士竭謀單智以緩民之死乃堙沒而無聞矣否閉極而泰道升聖人作而萬物覩指揮中原兵不頓刃向之滔天巨猾搖毒煽禍以害斯人者蹈鼎鑊斧鑕之不暇豈非人邪天與人相為表裏和同於無間聖人知天之所助人之所歸國之所恃以為固者仁而已非特三代然也堯舜之盛漢唐之興秦隋之暴魏晉之亡南北之亂莫不曰此也五代距今百有餘年故老遺俗徃徃垂絕無能道說者史官秉筆之士或文采不足以耀無窮道學不足以繼述作使五十有餘年間廢興存亡之迹姦臣賊子之罪忠臣

義士之節不傳於後世來者無所考焉惟廬陵歐陽公慨然以自任蓋潛心累年而後成書其事迹實錄詳於舊記而褒貶義例仰師春秋由遷固而來未之有也至於論朋黨宦女忠孝兩全義子降服豈小補哉豈小補哉
五代史記目錄

第一卷

梁本紀第一 太祖上

第二卷

梁本紀第二

太祖下

第三卷

梁本紀第三

末帝

第四卷

唐本紀第四

莊宗上

第五卷

莊宗下

第六卷

唐本紀第六

明宗

第七卷

唐本紀第七

愍帝

廢帝

第八卷

晉本紀第八

高祖

第九卷

晉本紀第九

出帝

第十卷

漢本紀第十

高祖

隱帝

第十一卷

周本紀第十一

太祖

第十二卷

周本紀第十二

世宗

恭帝

第十三卷

梁家人傳第一

太祖文惠皇后王氏

元貞皇后張氏

陳昭儀

李昭容

末帝妃張氏

妃郭氏

太祖子友裕

友珪

友璋

友雍

友徽

友孜

友文

兄全昱

全昱子友諒

友能

友誨

兄存子友寧

友倫

第十四卷

唐太祖家人傳第二

太祖劉太妃

貞簡皇后曹氏

莊宗神閔敬皇后劉氏

淑妃韓氏

德妃伊氏

太祖子存美

存霸

存禮

存渥

存乂

存確

存紀

太祖弟克讓

克脩

克脩子嗣弼

嗣肱

克恭

克寧

克寧子瓌

莊宗子繼安

繼潼

繼嵩

繼蟾

繼堯

第十五卷

唐明宗家人傳第三

明宗和武憲皇后曹氏

昭懿皇后夏氏

宣憲皇后魏氏

淑妃王氏

愍帝哀皇后孔氏

明宗子從璟

從榮

從益

姪從璨

從璋

從溫

從敏

第十六卷

唐廢帝家人傳第四

皇后劉氏

重吉

重美

第十七卷

晉家人傳第五

高祖皇后李氏

太妃安氏

出帝皇后馮氏

高祖子重信

重乂

重英

重進

重睿

重杲

高祖叔父萬友

萬友子敬威

敬贇

萬銓

萬銓子敬暉

高祖兄敬儒

高祖弟敬德

敬殷

重胤

出帝子延煦

延寶

第十八卷

漢家人傳第六

高祖皇后李氏

高祖弟崇信

高祖子承訓

承勳

姪贊

第十九卷

周太祖家人傳第七

聖穆皇后柴氏

淑妃楊氏

貴妃張氏

德妃董氏

子侗

信

姪守愿

奉超

遜

第二十卷

周世宗家人傳第八

柴守禮

世宗貞惠皇后劉氏

宣懿皇后符氏

後立皇后符氏

世宗子誼

誠

誠

熙讓

熙謹

第二十一卷

梁臣傳第九

敬翔

李唐賓

葛從周

張存敬

劉捍

熙誨

朱珍

龐師古

霍存

符道昭

寇彥卿

第二十二卷

梁臣傳第十

唐懷英

牛存節

歸厚

王重師

劉鄩

張歸霸

歸弁

徐懷玉

第二十三卷

梁臣傳第十一

楊師厚

賀瓌

馬嗣徽

謝彥章

王景仁

王檀

王虔裕

第二十四卷

唐臣傳第十二

郭崇韜

安重誨

第二十五卷

唐臣傳第十三

周德威

符存審

史建瑭子匡翰

王建及

元行欽

安金全

袁建豐

西方鄴

第二十六卷

唐臣傳第十四

符習

烏震

孔謙

張廷朗

李巖

李仁矩

毛璋

第二十七卷

唐臣傳第十五

朱弘昭馮贇附

劉延朗

康思立

康義誠

藥彥稠

第二十八卷

唐臣傳第十六

豆盧革

盧程

任圜

趙鳳

李襲吉

張憲

蕭希甫

劉贊

何瓚

第二十九卷

晉臣傳第十七

桑維翰

景延廣

吳巒

第三十卷

漢臣傳第十八

蘇逢吉

史弘肇

楊邠

王章

劉銖

李業

聶文進

後贊

郭允明

第三十一卷

周臣傳第十九

王朴

鄭仁誨

扈載

第三十二卷

死節傳第二十

王彥章

裴約附

劉仁贍附

第三十三卷

死事傳第二十一

張源德

夏魯奇

姚洪

王思同

張敬達

翟進宗

沈斌

王清

史彥超

孫晟

第三十四卷

一行傳第二十二

鄭遨

張薦明

石昂

程福贇

李自倫

第三十五卷

唐六臣傳第二十三

張文蔚

楊涉

張策

趙光逢

薛貽矩

蘇循 杜曉附

第三十六卷

義兒傳第二十四

李嗣昭

嗣本

嗣恩

存信

存孝

存進

存璋

存賢

第三十七卷

伶官傳第二十五

敬新磨

景進

史彥瓊

郭從謙

第三十八卷

宦者傳第二十六

張承業

張居翰

第三十九卷

雜傳第二十七

王鎔

羅紹威

王處直

劉守光

第四十卷

雜傳第二十八

李茂貞

韓建

李仁福

韓遜

楊崇本

高萬興

溫韜

第四十一卷

雜傳第二十九

盧光稠

譚全播

雷滿

鍾傳

趙匡疑

第四十二卷

雜傳第三十

朱宣

瑾

王師範

李罕之

孟方立

王珂

趙犖

馮行襲

第四十三卷

雜傳第三十一

氏叔琮

李彥威

李振

韋震

孫德昭

蔣殷

第四十四卷

雜傳第三十二

劉知俊

賀德倫

康延孝

第四十五卷

雜傳第三十三

張全義

袁象先

段凝

周知裕

第四十六卷

雜傳第三十四

趙在禮

房知温

安重霸

裴迪

孔循

王敬

丁會

閻寶

朱友謙

朱漢賓

劉玘

陸思鐸

霍彦威

王晏球

王建立

康福

郭延魯

第四十七卷

雜傳第三十五

華溫琪

萇從簡

張筠 弟錢

楊彥詢

李周

劉處讓

李承約

張希崇

相里金

張廷蘊

馬全節

皇甫遇

安彥威

李瓊

劉景巖

第四十八卷

雜傳第三十六

盧文進

李金全

楊思權

王弘贄

劉審交

王周

高行周

行珪

白再榮

安叔千

第四十九卷

雜傳第三十七

翟光鄴

皇甫暉

王進

孫方諫

第五十卷

雜傳第三十八

王峻

劉詞

折從阮

第五十一卷

雜傳第三十九

朱守殷

范延光

安重榮

楊光遠

第五十二卷

雜傳第四十

杜重威

張彥澤

第五十三卷

馮暉

唐景思

常思

王殷

王環

董璋

婁繼英

安從進

李守貞

雜傳第四十一

王景崇

趙思綰

慕容彥超

第五十四卷

雜傳第四十二

馮道

李珽

李琪

鄭珏

李愚

盧道

司空頴

第五十五卷

雜傳第四十三

劉昫

盧文紀

馬胤孫

姚顛

劉岳

馬縞

盧損

崔居儉

崔棹

李譯

第五十六卷

雜傳第四十四

和凝

趙瑩

馮玉

盧質

呂琦

薛融

何澤

王權

史珪

龍敏

第五十七卷

雜傳第四十五

李崧

李鱗

賈緯

段希堯

張允

王松

裴皞

王仁裕

裴羽

王延

馬重績

趙延義

第五十八卷

司天考第一

第五十九卷

司天考第二

第六十卷

職方考第三

第六十一卷

吳世家第一

楊行密

子涯

隆演

溥

徐温

第六十二卷

南唐世家第二

李昇

子景通

景子煜

第六十三卷

前蜀世家第三

王建

子衍

第六十四卷

後蜀世家第四

孟知祥

子景

第六十五卷

南漢世家第五

劉隱

弟龔

龔子玠

晟

晟子鋹

第六十六卷

楚世家第六

馬殷

子希聲

希範

希廣

周行逢

劉言

第六十七卷

吳越世家第七

錢鏐

子元瓘

元瓘子佐

俶

第六十八卷

閩世家第八

王審知

子延翰
子延義

鑄
延政

鑄子繼鵬

第六十九卷

南平世家第九

高季興

子從誨

從誨子保融

保勗

保融子繼冲

第七十卷

東漢世家第十

劉旻

子承鈞

承鈞子繼恩

繼元

第七十一卷

十國世家年譜第十一

七十二卷

四夷附錄第一

夷狄

第七十三卷

四夷附錄第二

兀欲

第七十四卷

四夷附錄第三

奚

吐渾

達靺

突厥

回鶻

高麗

新羅

南詔

占城

党項

吐蕃

于闐

渤海

黑水

样柯

本紀十二卷

列傳四十五卷

司天職方考三卷

世家年譜十一卷

四夷附錄三卷

五代史記目錄終

五代史記卷第一

梁本紀一

宋歐陽脩撰

徐無黨註

本紀因舊以為名本原其所始起而紀次其事與時也即位以前其事詳原本其所自來故曲而備之見其起之有漸有暴也即位以後其事略居尊任重所責者大故所書者簡惟簡乃可立法

太祖神武元聖孝皇帝姓朱氏宋州碭山午溝里人也其

父誠以五經教授鄉里生三子曰全昱存溫

變諱某書名義在稱王注中

誠卒三子貧不能為生與其母傭食蕭縣人劉崇家全昱無他材能然為人頗長者存溫勇有力而溫尤兇悍唐僖

宗乾符四年黃巢起曹濮存溫亡入賊中巢攻嶺南存戰死巢陷京師以溫為東南面行營先鋒使攻陷同州以為

同州防禦使是時天子在蜀諸鎮會兵討賊

諸鎮記當時語也唐謂節度使

所治軍州為藩鎮故有赴鎮移鎮之語

溫數為河中王重榮所敗屢請益兵於

巢巢中尉孟楷抑而不通溫客謝瞳說溫曰黃家起於草莽幸唐衰亂直接其隙而取之爾非有功德興王之業也此豈足與共成事哉今天子在蜀諸鎮之兵日集以謀興復是唐德未馱於人也且將軍力戰於外而庸人制之於內此章邯所以背秦而歸楚也溫以為然乃殺其監軍嚴實自歸于河中因王重榮以降都統王鐸承制拜溫左金吾衛大將軍河中行營招討副使天子賜溫名全忠中和三年三月拜全忠汴州刺史宣武軍節度使四月諸鎮兵

破巢復京師巢走藍田七月丁卯全忠歸于宣武是歲黃

巢出藍田關陷蔡州節度使秦宗權叛附于巢遂圍陳州

徐州時溥

凡稱某州某人者皆其節度使

為東南面行營兵馬都統會東諸

鎮兵以救陳陳州刺史趙犍亦乞兵于全忠溥雖為都統

而不親兵四年全忠乃自將救犍率諸鎮兵擊敗巢將黃

鄴尚讓等犍以全忠為德始附屬焉是時河東李克用下

兵太行度河出洛陽與東兵會擊巢巢已敗去全忠及克

用追敗之于郟城巢走中牟又敗之于王滿巢走封丘又

大敗之巢挺身東走至泰山狼虎谷為時溥追兵所殺九

月天子以全忠為檢校司徒同中書門下平章事封沛郡

侯光啓二年三月進爵王義成軍亂逐其節度使安師儒
推牙將張驍為留後師儒來奔殺之遣朱賓李唐賓陷滑
州以胡真為留後十二月徙封吳興郡王自黃巢死秦宗
權稱帝陷陝洛懷孟唐許汝鄭州遣其將秦賢盧瑋張旺
攻汴賢軍板橋旺軍北郊瑋軍萬勝環汴為三十六柵王
顧兵少不敢出

始而稱名既而稱爵既而稱帝
漸也爵至王而後稱著其逼者

乃遣朱珍募兵

於東方而求救于兖鄆三年春珍得兵萬人馬數百匹以
歸乃擊賢板橋拔其四柵又擊瑋萬勝瑋敗投水死宗權
聞瑋等敗乃自將精兵數千柵北郊五月兖州朱瑾鄆州
朱宣來赴援

流俗本宣
從王者非

王置酒軍中中席王陽起如廁以

輕兵出北門襲旺而樂聲不輟旺不意兵之至也兖鄆之
兵又從而合擊遂大敗之斬首二萬餘級宗權與旺夜走
過鄭屠其城而去宗權至蔡復遣張旺攻汴王聞旺復來
登封禪寺後岡望旺軍過遣朱珍躡之戒曰旺見吾兵必
止望其止當速返毋與之鬪也已而旺見珍在後果止珍
即馳還王令珍引兵蔽大林而自率精騎出其東伏大冢
間旺止而食食畢拔旗幟馳擊珍珍兵小却王引伏兵橫
出斷旺軍為三而擊之旺大敗脫身走宗權怒斬旺而河
陽陝洛之兵為宗權守者聞蔡精兵皆已殲於汴因各潰
去故諸葛爽將李罕之取河陽張全義取洛陽以來附十

月天子使來賜王紀功碑朱宣朱瑾兵助汴已破宗權東歸王移檄交鄆誣其誘汴亡卒以東乃發兵攻之取其曹州濮州遂遣朱珍攻鄆大敗而還十二月天子使來賜王鐵券及德政碑淮南節度使高駢死楊行密入揚州天子以王兼淮南節度使王乃表行密為副使以行軍司馬李璠為留後璠之揚州行密不納文德元年正月王如淮南至宋州而還是時秦宗權陷襄州以趙德諱為節度使德諱叛于宗權以來附天子因以王為蔡州四面行營都統以德諱為副三月庚子僖宗崩天雄軍亂囚其節度使樂彥真其子相州刺史從訓攻魏來乞兵遣朱珍助從訓攻魏而魏軍殺彥真從訓戰死魏人立羅弘信珍乃還張全義取河陽逐李罕之罕之奔于河東李克用遣兵圍河陽全義來求救遣丁會牛存節救之擊敗河東兵于沔河五月行營討蔡州圍之百餘日不克是時時溥已為東南面都統又以王統行營而溥猶稱都統王乃上書論溥討蔡無功而不落都統且欲激怒溥以起兵端初高駢死淮南亂楚州刺史劉瓚來奔納之及王兵攻蔡不克還欲攻徐乃遣朱珍將兵數千以東聲言送瓚還楚州溥怒論已又聞珍以兵來果出兵拒之珍戰于吳康大敗之取其豐蕭二縣遂攻宿州下之珍屯蕭縣別遣龐師古攻徐州龍紀

元年正月師古敗溥于呂梁淮西牙將申叢執秦宗權折其足將檻送京師別將郭璠殺叢篡宗權以來獻王遣行軍司馬李璠獻俘于京師表郭璠淮西留後三月天子封王為東平王七月朱珍殺李唐賓王如蕭縣執珍殺之遂攻徐州冬大雨水不能屯軍而旋初秦宗權遣其弟宗衡掠地淮南是歲宗衡為其將孫儒所殺儒攻揚行密于揚州淮南大亂行密走宣州儒入揚州大順元年春遣龐師古攻孫儒于淮南大敗而還四月宿州將張筠以宿州復歸于時溥王自將攻之不克初黃巢敗走李克用追之至于冤胸不及而旋過汴駐軍于北郊王邀克用置酒上源

驛夜以兵攻之克用踰城而免訟其事于京師天子知曲在汴而和解之至是宰相張濬私與汴交王厚之以賂濬為汴請伐河東唐諸大臣皆以為不可興師濬挾汴力請益堅天子不得已而許之五月以濬為太原四面行營都統王為東南面招討使然王不親兵以兵三千屬濬而已濬屯于陰地河東叛將馮霸殺潞州守將李克恭來降遣葛從周入潞州李克用遣康君立攻之從周走河陽九月王如河陽十月天子以王兼宣義軍節度使遂如滑州假道于魏以攻河東且責其軍須亦所以怒魏為兵端也魏人果以謂非兵所當出而辭以糧乏皆不許於是攻魏十

五月張濬之師大敗于陰地二年正月王及魏人戰于內黃大敗之屠故元城羅弘信來送款十月克宿州十一月曹州將郭紹賓殺其刺史郭饒來降十二月丁會敗朱瑾于金鄉景福元年二月攻鄆州前軍朱友裕敗于斗門王軍後至又敗而還冬友裕取濮州遂攻徐州二年四月龐師古克徐州殺時溥王如徐州以師古為留後遂攻兗鄆乾寧元年二月王及朱宣戰于漁山大敗之二年八月又敗宣于梁山十一月又敗之于鉅野兗鄆求救于河東李克用發兵救之假道于魏既而魏人擊之克用怒大舉攻魏羅弘信來求救遣葛從周救魏是歲李克用封晉王三

年五月戰于洹水擒克用子落落送于魏殺之七月鳳翔李茂貞犯京師天子出居于華州王請以兵赴難天子優詔止之又請遷都洛陽不許四年正月龐師古克鄆州王如鄆州以朱友裕為留後遂克兗州朱瑾奔于淮南以葛從周為兗州留後九月攻淮南龐師古出清口葛從周出安豐王軍屯于宿州楊行密遣瑾先擊清口師古敗死從周亟返兵至于潁河瑾又敗之王懼馳歸光化元年三月天子以王兼天平軍節度使四月遣葛從周攻晉之山東取邢洛磁三州襄州趙匡凝自其父德誼時來附匡凝又與楊行密李克用通而其事泄七月遣氏叔宗康懷英攻

匡凝取其祕隨鄧三州

曾三異校定曰三異案唐書地理志唐州天祐二年朱全忠徙為祕陽表更乞泌州

則是天祐二年唐州舊名猶在至三年始更為泌光化之初未當有泌州之名今書為泌則誤也

匡凝請和乃止

十二月李罕之以潞州來降二年幽州劉仁恭攻魏羅紹威來求救王救魏敗仁恭于內黃四月遣氏叔宗攻晉太原不克七月李克用取澤潞十一月保義軍亂殺其節度使王珙推其牙將李璠為留後其將朱簡殺璠來降以簡為保義軍節度使三年四月遣從周攻劉仁恭之滄州取其德州及仁恭戰于老鵝堤大敗之八月晉取洛州王如洛州復取之是時鎮定皆附于晉遂攻鎮州破臨城王鎔來送款進攻定州王郃奔于晉其將王處直以定州降唐

宦者劉季述作亂天子幽于東宮天復元年正月護駕都頭孫德昭誅季述天子復立封王為梁王遣張存敬攻王珂于河中出含山下晉絳二州王珂求救于晉晉不能救乃來降三月大舉攻晉氏叔宗出太行取澤潞葛從周張存敬侯言張歸厚及鎮定之兵皆會于太原圍之不克遇雨而退五月天子以王兼河中尹護國軍節度使六月晉取慈隰自劉季述等已誅宰相崔胤外與梁交欲假梁兵盡誅宦者而鳳翔李茂貞邠寧王行瑜等皆遣子弟以精兵宿衛天子宦者韓全誨等亦因恃以為助天子與胤計事宦者屬耳頗聞之乃選美女內之宮中陰令伺察其實

久之果得胤奏謀所以誅宦者之說全誨等大懼日夜相與涕泣思圖胤以求全胤知謀泄事急即矯為制召梁兵入誅宦者十月王以宣武宣義天平護國兵七萬至于河中取同州遂攻華州韓建出降全誨等聞梁王兵且至即以岐邠宿衛兵劫天子奔于鳳翔王乃上書言胤所以召之之意天子怒罷胤相責授工部尚書詔梁兵還鎮王引兵去攻邠州屯于三原邠州節度使楊崇本以邠寧慶衍四州降崔胤奔于華州二年春王退軍于河中晉攻晉絳遣朱友寧擊敗晉軍于蒲縣取汾慈隰遂圍太原不克而還汾慈隰復入于晉四月友寧引兵西至興平及李茂貞

戰于武功大敗之王兵犯鳳翔茂貞數出戰輒敗遂圍之十一月鄜坊李周彝以兵救鳳翔王遣孔勅襲鄜州虜周彝之族徙于河中周彝乃降是時岐兵屢敗而圍久城中食盡自天子至後宮皆凍餒三年正月茂貞殺韓全誨等二十人囊其首示梁軍約出天子以為解甲天子出幸梁軍遣使者馳召崔胤胤託疾不至王使人獻胤曰吾未識天子懼其非是子來為我辨之天子還至興平胤率百官奉迎王自為天子執轡且泣且行行十餘里止之人見者咸以為忠己巳天子至鳳翔素服哭于太廟而後入殺宦者七百餘人二月甲戌天子賜王回天再造竭忠守正功

臣以輝王祚為諸道兵馬元帥王為副元帥王乃留子友倫為護駕指揮使

曾三異校定曰三異案家人傳友倫乃王兄存之子其後中書上議亦皆謂之皇姪

為天子衛引兵東歸天子餞于延喜樓賜楊柳枝五曲初梁兵已西青州王師範遣其將劉鄩襲據梁兗州王已還

梁四月如鄆州遣朱友寧攻青州師範敗之于石樓友寧死九月揚師厚敗青人于臨朐取其棣州師範以青州降

而鄆亦降友倫擊鞠墮馬死王怒以為崔胤殺之遣朱友

謙殺胤于京師

曾三異校定曰三異案家人傳殺崔胤者朱友謙非友謙

其與友倫擊鞠者

皆殺之自天子奔華州王請遷都洛陽雖不許而王命河南張全義修洛陽宮以待天祐元年正月王如河中遣牙

將寇彥卿如京師請遷都洛陽并徙長安居人以東天子

行至陝州王朝于行在先如東都是時六軍諸衛兵已散

亡其從以東者小黃門十數人打毬供奉內園小兒等二

百餘人行至穀水王教醫官許昭遠告其謀亂悉殺而代

之然後以聞由是天子左右皆梁人矣四月甲辰天子至

自西都是時晉王李克用岐王李茂貞楚王趙匡凝蜀王

王建吳王楊行密

曾三異校定曰三異案克用本紀及茂貞傳建行密世家皆書其在唐所授獨匡凝不書其在唐此

乃闕文

聞梁遷天子洛陽皆欲舉兵討梁王大懼六月楊崇

本復附于岐王乃以兵如河中聲言攻崇本遣朱友恭氏

叔琮蔣玄暉等行弒昭宗崩十月王朝于京師殺朱友恭

氏叔琮十一月攻淮南取其光州攻壽州不克而旋二年
二月遣蔣玄暉殺德王裕等九王于九曲池六月殺司空
裴贄等百餘人七月天子復使來賜王迎鑾紀功碑王欲
代唐使人諭諸鎮襄州趙匡凝以為不可遣楊師厚攻之
取其唐鄧復郢隨均房七州王如襄州軍于漢北九月師
厚破襄州匡凝奔于淮南師厚取荆南荆南留後趙明奔
于蜀遂出光州以攻壽州不克天子卜祀于南郊王怒
以為蔣玄暉等欲祈天以延唐天子懼改卜郊十一月辛
巳天子封王為魏王相國摠百揆以宣武宣義天平護國
天雄武順佑國河陽義武昭義武寧保義忠義武昭武定
泰寧平盧匡國鎮國荆南忠武二十一軍為魏國備九錫
王怒不受十二月天子以王為天下兵馬元帥王益怒遣
人告樞密使蔣玄暉與何太后私通殺玄暉而焚之遂弑
太后于積善宮又殺宰相柳璨太常卿張延範車裂以徇
天子下詔以太后故停郊三年春魏州羅紹威謀殺其牙
軍來假兵以虞變王為發兵北攻劉仁恭之滄州兵過魏
而紹威已殺牙軍其兵之在外者果皆叛據貝衛澶博州
王以兵悉殺之遂攻滄州軍于長蘆劉仁恭求救于晉晉
人取潞州王乃旋軍

楊涉為門下侍郎御史大夫薛貽矩為中書侍郎同中書

門下平章事戊寅渤海契丹遣使者來夷狄君臣姓名言爵或書或否不必備或

因其舊史之詳畧但書其來以示意尔乙酉兄全昱為廣王子友文博王友

非子而書子語在家人傳友珪郢王友璋福王友貞均王友徽建王姪友

諒衡王友能惠王友誨邵王甲午改樞密院為崇政院太

府卿敬翔為使是月潞州行營都指揮使李思安及晉人

戰敗績我敗曰敗績彼敗之文理宜然已見有營故戰不言也六月甲寅平盧軍節度

使韓建守司徒同中書門下平章事秋七月己亥追尊祖

考為皇帝妣為皇后皇高祖黯謚曰宣元廟號肅祖祖妣

范氏謚曰宣僖曾祖茂琳謚曰光獻廟號敬祖祖妣楊氏

謚曰光孝祖信謚曰昭武廟號憲祖祖妣劉氏謚曰昭懿

孝誠謚曰文穆廟號烈祖妣王氏謚曰文惠八月丁卯同

州蚘蚘蟲生隰州黃河清於是書見不為瑞也九月括馬冬十月己未

講武于繁臺十一月壬寅赦亡命背軍髡黥刑徒於好殺之世小赦必

書見其亦有愛人之意也二年春正月丁酉渤海遣使者來己亥卜郊于

西都弑濟陰王弑臣子之大惡也書濟陰王從其實書弑正梁罪名二月辛未契丹阿保

機遣使者來三月壬申朔如西都辛已至也如往而未至之辭書如則在道有事可以書

丙子如懷州五代亂世兵無虛日不可悉書故用兵荒勝敗攻城無得失皆不書其命大將與天子有所如且著大事爾此

如懷澤者以兵方攻潞州也丁丑如澤州戊寅封鴻臚卿李崧介國公為

二王後梁嘗更戊曰武而舊史悉復為戊壬午匡國軍節度使劉知俊為潞

州行營招討使癸巳改卜郊張文蔚薨夏四月癸卯楊涉

罷吏部侍郎于兢為中書侍郎翰林學士承旨禮部侍郎

張策為刑部侍郎同中書門下平章事壬子至澤州五月

己丑潞州行營都虞候康懷英及晉人戰于夾城敗績築城

圍潞戰于城中故書地

戊戌立唐三廟契丹遣使者來六月壬寅忠武

軍節度使劉知俊為西路行營招討使以伐岐用兵之名自四兩相攻曰

攻以大加小曰伐加有罪曰討天子自往曰征隨事為文不得不異非有褒貶也己酉殺右金吾衛上將軍

王師範滅其族當殺曰伏誅不當殺書以兩相當為文丙辰劉知俊及岐人戰于

莫谷敗之秋九月丁丑如陝州以晉人攻晉絳故也博王友文留守東

都冬十月丁未至自陝州十一月癸巳張策罷左僕射楊

涉同中書門下平章事十二月己亥以介國公為三恪鄜

國公萊國公為二王後

三年春正月甲戌如西都復然燈以祈福然燈風俗相傳自天子至于庶人舉天下

同其奢樂而風俗散之大者故錄其詔意則其失可知庚寅享于太廟辛卯有事于南郊祀

于南郊書曰有事錄當時語大赦丙申群臣上尊號曰睿文聖武廣孝皇

帝二月壬戌講武于西杏園甲子延州高萬興叛于岐來

降唐末之亂強弱相并或去彼來此不可為常難於遽責至此乃書曰叛始正其定分也三月辛未渤海國王

大諲譔遣使者來甲戌如河中以高萬興降劉知俊兵攻鄜延故也山南東道

節度使楊師厚為潞州四面行營招討使劉知俊取丹州

夏四月丙午知俊克延鄜坊三州易傳曰取難得曰克文理宜然爾五曰已

卯至自河中殺佑國軍節度使王重師六月庚戌劉知俊

執佑國軍節度劉捍叛附于岐以自身歸曰降以地歸曰附亦文理宜爾知俊為忠武軍節度使以同

州附岐今直書知俊而不言地蓋忠武已見上文辛亥如陝州以劉知俊叛故也乙卯冀王朱友

謙為同州東面行營招討使劉知俊奔于岐丹州軍亂逐

其刺史宋知誨秋七月商州軍亂逐其刺史李稠稠奔于

岐乙丑克丹州執其首惡王行思初不知首惡之人故直曰軍亂既克而推得之也丹州無主將

姓名行思無官爵又不見伏誅之日皆舊史失之乙亥至自陝州甲申襄州軍亂殺其

留後王班智不足以衛身才不足以治眾而見殺者不書死之而以被殺為文見死得其死者士之大節不妄以予人房州

刺史楊虔叛附于蜀八月辛亥降死罪囚辛酉均州刺史

張敬方克房州執楊虔閏月癸契丹遣使者來己卯閱稼

于西苑九月壬寅行營招討使左衛上將軍陳暉克襄州

執其首惡李洪命暉討亂舊史失不書至此始見既克而推得其首惡故初亦且書軍亂丁未保義軍

節度使王檀為潞州東面行營招討使辛亥韓建楊涉罷

太常卿趙光逢為中書侍郎翰林學士承旨工部侍郎杜

曉為戶部侍郎同中書門下平章事辛酉李洪楊虔伏誅

冬十一月甲午日南至告謝于南郊南至不必書因其以至日告謝而書告謝主用至日

故書之不曰有事于南郊亦從其本語蓋比南郊禮差簡己酉搜訪賢良鎮國軍節度使康懷

英伐岐十二月懷英克寧慶衍三州及劉知俊戰于升平

敗績

四年春正月壬辰朔始用樂自唐末之亂禮樂亡至此始用樂故書丁未講武

于榆林二月己丑閏稼于穀水秋八月丙寅如陝州以岐人晉人攻

夏州故也河南尹張宗奭留守西都辛未護國軍節度使楊師

厚為西路行營招討使以伐岐九月己丑至自陝州辛亥

搜訪賢良冬十一月己丑寧國軍節度使王景仁為北面

行營招討使以伐趙趙王王鎔北平王王處直叛附于晉

晉人救趙十二月癸酉頒律令格式

乾化元年春正月丁亥王景仁及晉人戰于柏鄉敗績庚

寅赦流罪以下囚求危言正諫癸巳天雄軍節度使楊師

厚為北面行營招討使夏四月壬申契丹阿保機遣使者

來五月甲申朔大赦改元癸巳幸張宗奭第秋八月戊辰

閏稼于榆林渤海遣使者來戊寅大閱于興安鞠場九月

辛巳朔御文明殿入閣御殿而云入閣錄其本語書之以見禮失事在李琪列傳此禮其後履行皆不書一書以

見其失足矣庚子如魏州以晉人攻魏故也張宗奭留守西都冬十月丙

子大閱于魏東郊十一月高萬興取鹽州壬辰至自魏州

乙未回鶻吐蕃遣使者來

二年春二月丁巳光祿卿盧玘使于蜀甲子如魏州亦以晉人及鎮

定攻相魏也張宗奭留守西都次白馬殺左散騎常侍孫儻右諫

議大夫張衍兵部郎中張雋戊寅如貝州三月丙戌屠棗

疆書屠著其酷之甚者丁未復如魏州夏四月己巳至自魏州不書如西都則此至

東都戊寅如西都五月丁亥德音降死罪已下囚德音赦之者從小其

本名以罷役徒禁屠及捕生渤海遣使者來是月薛貽矩

薨六月疾革郢王友珪反叛者皆此而附彼猶臣於人也反自下而謀上惡逆之大者日月之書不書雖無義

例而事亦有不得而曰反非一朝一夕不能得其日故反者皆不曰戊寅皇帝崩年六十一不書崩處以異於

友珪葬之河南伊關縣號宣陵以不得其死故不書葬

嗚呼天下之惡梁久矣自後唐以來皆以為偽也至予論

次五代獨不為梁議者或譏予大失春秋之旨以謂梁負

大惡當加誅絕而反進之是將篡也非春秋之志也予應

之曰是春秋之志爾魯桓公弑隱公而自立者宣公弑子

赤而自立者鄭厲公逐世子忽而自立者衛公孫剽逐其

君衍而自立者聖人於春秋皆不絕其為君此子所以不

偽梁者用春秋之法也然則春秋亦將篡乎曰惟不絕四

者之為君於此見春秋之意也聖人之於春秋用意深故

能勸戒切為言信然後善惡明夫欲著其罪於後世在乎

不沒其實其實嘗為君矣書其為君其實篡也書其篡各

傳其實而使後世信之則四君之罪不可得而掩爾使為

君者不得掩其惡然後人知惡名不可逃則為惡者庶乎

其息矣是謂用意深而勸戒切為言信而善惡明也桀紂

不待貶其王而萬世所共惡者也春秋於大惡之君不誅

絕之者不害其褒善貶惡之旨也惟不沒其實以著其罪

而信乎後世與其為君而不得掩其惡以息人之為惡能

知春秋之此意然後知予不偽梁之旨也

五代史記卷第二

五代史記卷第三

梁本紀三

宋歐陽脩撰 徐無黨註

末帝太祖第三子友貞也

末非謚號從其本語

為人美容貌沈厚寡言

雅好儒士太祖即位封均王為左天興軍使東京馬步軍都指揮使乾化二年六月太祖遇弒友珪自立殺博王友文以弒帝之罪歸之以王為東京留後開封尹敬翔為中書侍郎同中書門下平章事戶部尚書李振為崇政院使明年友珪改元鳳曆二月駙馬都尉趙巖至東都王私與之語遣馬橫交之魏州見楊師厚計事師厚遣小校王惟賢至洛陽告左龍虎統軍袁象先使討賊是時懷州龍驤

屯兵叛方捕索之王乃偽為友珪詔書發左右龍驤在東都者皆還洛陽因激怒之曰天子以懷州屯兵叛追汝等欲盡坑之諸將皆泣莫知所為王曰先皇帝經營王業三十餘年今日尚為友珪所殺汝等安所逃死乎因出太祖畫像示諸將而泣曰汝能趨洛陽擒逆賊則轉禍為福矣軍士皆呼萬歲請王為主王乃遣人趨象先等庚寅象先等以禁兵討賊友珪死杜曉見殺象先遣趙巖持傳國寶至東都請王入洛陽王報曰夷門太祖所以興王業也北拒并汾東至淮海國家藩鎮多在東方命將出師利於便近是月皇帝即位于東都即位大事失其日而書是月見亂世之甚於東都終上文也復稱乾

化三年復博王友文官爵三月丁未更名鎰夏五月楊師厚取滄州秋九月甲辰御史大夫姚洎為中書侍郎同中書門下平章事冬十二月晉人取幽州

四年夏四月丁丑貶于兢為萊州司馬武寧軍節度使蔣殷及天平軍節度使牛存節討之

貞明元年春正月存節克徐州蔣殷自燔死故不書伏誅三月丁卯趙光

逢罷平虜軍節度使賀德倫為天雄軍節度使命官不書非常而有故則

使已丑天雄軍亂賀德倫叛附于晉書此書為天分其相澶衛州為昭德軍宣徽使張筠為節度

雄軍亂張本倫叛責貴者深也德倫不

可加以首惡而可責其不死以叛張彥實首惡而畧不書彥微者彥微者德倫可以誅而不誅故以德倫獨任其責可白也

衡叛于岐來附夏六月庚寅朔晉王李存勗入于魏州遂

取德州冬十月辛亥康王友孜反伏誅反者不日誅反者有日故書十一

月乙丑改元耀州温昭圖叛于岐來附是歲名瑱舊史失其日月

二年春二月丙申楊涉罷三月鎮南軍節度使劉鄩及晉

人戰于故元城敗績奔于滑州晉人取衛州惠州捉生都

將李霸反伏誅夏六月捉生都將張温叛降于晉秋七月

晉人取相州張筠奔于京師安國軍節度使閻寶叛附于

晉八月丁酉太子太保致仕趙光逢為司空兼門下侍郎

同中書門下平章事九月晉人取滄州橫海軍節度使戴

思遠奔于京師晉人克貝州守將張源德死之書死得其死也冬

十月丁酉中書侍郎鄭珏同中書門下平章事

三年夏四月辛卯右千牛衛大將軍劉瓛使于契丹冬十

二月宣義軍節度使賀瓌為北面行營招討使己巳如西

都卜郊晉人取揚劉

四年正月不克郊己卯至自西都夏四月己酉尚書吏部

侍郎蕭頊為中書侍郎同中書門下平章事己巳趙光逢

罷冬十二月庚子朔賀瓌殺其將謝彥章孟審澄侯温裕

癸亥瓌及晉人戰于胡柳敗績是歲泰寧軍節度使張守

進叛于晉亳州團練使劉鄩為交州安撫制置使以討之

舊史不書亡其日月故書于歲末為明年克交州張本

五年春正月晉軍于德勝用兵無勝敗不書此梁晉得失所繫故書也秋八月乙未

朔開封尹王瓚為北面行營招討使冬十月劉鄩克兗州

張守進伏誅十二月晉人取濮陽天平軍節度使霍彥威

為北面行營招討使

六年夏四月己亥降死罪以下囚乙巳尚書左丞李琪為

中書侍郎同中書門下平章事河中節度使朱友謙襲同

州殺其節度使程全暉叛附于晉泰寧軍節度使劉鄩討

之秋七月陳州妖賊毋乙自稱天子九月庚寅供奉官郎

公遠為契丹歡好使冬十月毋乙伏誅

龍德元年春趙將張文禮殺其君鎔來乞師不許文禮初為鎔養子號

王德明此書張文禮者從舊史也

三月丁亥朔禁私度僧尼陳州刺史惠王友

能反夏五月丙戌朔德音改元降流罪已下囚秋赦友能

降封房陵侯天平軍節度使戴思遠為北面行營招討使

冬十月思遠及晉人戰于戚城敗績

二年春正月思遠襲魏州取成安秋八月滑州兵馬留後

段凝攻衛州執其刺史李存儒戴思遠克淇門共城新鄉

三年春三月潞州李繼韜叛于晉來附夏閏四月唐人取

鄆州晉未即位已自與梁為敵國至其建號於梁無所利害故不書唐建號而書唐人者因事而見爾五月庚申宣義

軍節度使王彥章為北面行營招討使取德勝南城秋八

月段凝為北面行營招討使先鋒將康延孝叛降于唐冬

五代史記卷第三
十月甲戌宣義軍節度使王彥章及唐人戰于中都敗績

死之凡官皆不重書此書者嫌彥章已罷招討使而與唐戰蓋罷使而別將兵以戰也唐人取曹州盜竊傳

國寶奔于唐戊寅皇帝崩年三梁亡書曰梁亡見唐莊宗之立速也四月莊宗立稱唐十月梁

始亡見唐不待滅梁而立

五代史記卷第三

五代史記卷第四

唐本紀四

宋歐陽脩撰 徐無黨註

莊宗光聖神閔孝皇帝其先本號朱邪蓋出於西突厥至其後世別自號曰沙陀而以朱邪為姓唐德宗時有朱邪盡忠者居於北庭之金滿州貞元中吐蕃贊普攻陷北庭徙盡忠於甘州而後屬之其後贊普為回鶻所敗盡忠與其子執宜東走贊普怒追之及于石門關盡忠戰死執宜獨走歸唐居之鹽州以隸河西節度使范希朝希朝徙鎮太原執宜從之居之定襄神武川之新城其部落萬騎皆驍勇善騎射號沙陀軍執宜死其子曰赤心懿宗咸通十

年神策大將軍康承訓統十八將討龐勛於徐州以朱邪赤心為太原行營招討沙陀三部落軍使以從破勛功拜單于大都護振武軍節度使賜姓名曰李昌國以之屬籍沙陀素彊而國昌恃功益橫恣懿宗患之十三年徙國昌雲州刺史大同軍防禦使國昌稱疾拒命國昌子克用尤善騎射能印中雙鳧為雲州守捉使國昌已拒命克用乃殺大同軍防禦使段文楚據雲州自稱留後唐以太僕卿盧簡方為振武節度使會幽并兵討之簡方行至鳳州軍潰由是沙陀侵掠代北為邊患矣明年僖宗即位以謂前太原節度使李業遇沙陀有恩而業已死乃以其子鈞為

靈武節度使宣慰沙陀六州三部落使

六州三部落皆不見其名處據唐書除使有此

語

爾以招緝之拜克用大同軍防禦使居久之國昌出擊党

項吐渾赫連鐸襲破振武克用聞之自雲州往迎國昌而雲州人亦閉關拒之國昌父子無所歸因掠蔚朔間得兵三千國昌入保蔚州克用還掠新城僖宗乃拜鐸大同軍使以李鈞為代州招討使以討沙陀乾符五年沙陀破遮虜軍又破岢嵐軍而唐兵數敗沙陀由此益熾北據蔚朔南侵忻代嵐石至大谷焉廣明元年招討使李琢會幽州李可舉雲州赫連鐸擊沙陀克用與可舉相距雄武軍其叔父友金以蔚朔州降于琢克用聞之遽還可舉追至藥

兒嶺大敗之琢軍夾擊又敗之于蔚州沙陀大潰克用父
 子亡入達靺克用少驍勇軍中號曰李鷓兒其一目眇及
 其貴也又號獨眼龍其威名蓋於代北其在達靺父之鬱
 鬱不得志又常懼其圖己因時時從其群豪歟獵或掛針
 于木或立馬鞭百步歟之輒中群豪皆服以為神黃巢已
 陷京師中和元年代北起軍使陳景思發沙陀先所降者
 與吐渾安慶等萬人赴京師行至絳州沙陀軍亂大掠而
 還景思念沙陀非克用不可將乃以詔書召克用於達靺
 承制以為代州刺史鴈門以北行營節度使率蕃漢萬人
 出石嶺關過太原求發軍錢節度使鄭從謹與之錢千緡

米千石克用怒縱兵大掠而還二年十一月景思克用復
 以步騎萬七千赴京師三年正月出于河中進屯乾坑巢
 黨驚曰鷓兒軍至矣二月敗巢將黃鄴於石隄谷三月又
 敗趙璋尚讓於良田坡橫尸三十里是時諸鎮兵皆會長
 安大戰渭橋賊敗走入城克用乘勝追之自光泰門先入
 戰春宮昇陽殿巢敗南走出藍田關京師平克用功第一
 天子拜克用檢校司空同中書門下平章事河東節度使
 以國昌為鴈門以北行營節度使十月國昌卒十一月遣
 其弟克脩攻昭義孟方立取其澤潞二州方立走山東以
 邢洛磁三州自別為昭義軍

昭義軍在唐時跨山東西管五州至是澤潞入于晉邢洛磁孟氏據

之故當時
有兩昭義

黃巢南走至蔡州降秦宗權遂攻陳州四年克用
以兵五萬救陳州出天井關假道河陽諸葛爽不許乃自
河中渡河四月敗尚讓於太康又敗黃鄴于西華巢且走
且戰至中牟臨河未渡而克用追及之賊衆驚潰北至封
丘又敗之巢脫身走克用追之一日夜馳三百里至于寃
眇不及而還過汴州休軍封禪寺朱全忠饗克用於上源
驛夜酒罷克用醉卧伏兵發火起侍者郭景銖滅燭匿克
用牀下以水醒面而告以難會天大雨滅火克用得從者
薛鐵賀田鵲等隨雷光進尉氏門出還軍中七月至于太
原訟其事于京師請加兵於汴遣弟克脩將兵萬人屯于

河中以待僖宗和解之用破巢功封克用隴西郡王光啓

元年河中王重榮與宦者田令孜有隙徙重榮兗州以定

州王處存為河中節度使詔克用以兵護處存之鎮克用不備

號故不稱王重榮使人給克用曰天子詔重榮俟克用至與處

存共誅之因偽為詔書示克用曰此朱全忠之謀也克用

信之八上表請討全忠僖宗不許克用大怒重榮既不肯

徙僖宗遣邠州朱玫鳳翔李昌符討之克用反以兵助重

榮敗玫于沙苑遂犯京師縱火大掠天子出居于興元克

用退屯河中朱玫亦反以兵追天子不及得襄王煚迫之

稱帝屯于鳳翔僖宗念獨克用可以破玫而不能使也當

破黃巢長安時天下兵馬都監楊復恭與克用善乃遣諫議大夫劉崇望以詔書召克用且道復恭意使進兵討攻等克用陽諾而不行明年孟方立死弟遷立大順元年克用擊破孟遷取邢洛磁三州乃遣安金俊攻赫連鐸於雲州幽州李匡威救鐸戰於蔚州金俊大敗於是匡威鐸及朱全忠等皆請因其敗伐之昭宗以克用破黃巢功高不可伐下其事臺省四品官議議者多言不可宰相張濬獨以謂沙陀前逼僖宗幸興元罪當誅可伐軍容使楊復恭克用所善也亦極諫以為不可昭宗然之詔諭全忠等全忠陰賂濬使持其議益堅昭宗不得已以濬為太原四面

行營兵馬都統韓建為副使是時潞州將馮霸叛降于梁梁遣葛從周入潞州唐以京兆尹孫揆為昭義軍節度使克用遣李存孝執揆于長子又遣康君立取潞州十一月濬及克用戰于陰地濬軍三戰三敗濬建遯歸克用兵大掠晉絳至于河中赤地千里克用上表自訴其辭慢侮天子為之引咎優詔答之二年二月復拜克用河東節度使隴西郡王加檢校太師兼中書令四月攻赫連鐸于雲州圍之百餘日鐸走吐渾八月大蒐于太原出晉絳掠懷孟至于邢州遂攻王鎔于鎮州克用柵常山西以十餘騎渡滹沱覘敵遇大雨平地水深數尺鎮人襲之克用匿林中

禱其馬曰吾世有太原者馬不嘶馬偶不嘶以免前軍李
存孝取臨城進攻元氏李匡威救鎔克用還軍邢州景福
元年王鎔攻邢州李存信李嗣勳等敗鎔于堯山二月會
王處存攻鎔戰于新市為鎔所敗八月李匡威攻雲州以
牽克用之兵克用潛入于雲州返出擊匡威匡威敗走十
月李存孝以邢州叛二年存孝求援於王鎔克用出兵井
陘擊鎔且以書招鎔而急攻其平山鎔懼遂與克用通和
獻帛五十萬匹出兵助攻邢州乾寧元年三月執存孝殺
之冬攻幽州李匡儔弃城走追至景城見殺以劉仁恭為
留後二年河中王重榮卒其諸子珂珙爭立克用請立珂

鳳翔李茂貞邠寧王行瑜華州韓建請立珙昭宗初兩難
之乃以宰相崔胤為河中節度使既而許克用立珂茂貞
等怒三鎮兵犯京師聞克用亦起兵乃皆罷去六月克用
攻絳州斬刺史王瑤瑤珙弟助珙以爭者七月至于河中
同州王行約奔于京師陽言曰沙陀十萬至矣謀奉天子
幸邠州茂貞假子闞圭亦謀劫幸鳳翔京師大亂昭宗出
居于石門克用軍留月餘不進昭宗遣延王戒丕丹王允
兄弟事克用且告急八月克用進軍渭橋以為邠寧四面行
營都統昭宗還京師十一月克用擊破邠州王行瑜走至
慶州見殺克用還軍雲陽請擊茂貞昭宗慰勞克用使與

茂貞解仇以紓難拜克用忠正平難功臣封晉王是時晉軍渭北遇雨六十日或勸克用入朝克用未決都押衙蓋寓曰天子還自石門寢未安席若晉兵渡渭人情豈復能安勤王而已何必朝哉克用笑曰蓋寓猶不信我况天下乎乃收軍而還三年正月昭宗復以張濬為相克用曰此朱全忠之謀也乃上表曰若陛下朝以濬為相則臣將暮至闕廷京師大恐濬命遽止朱全忠之攻兗鄆也克用遣李存信假道魏州以救朱宣等存信屯千莘縣軍士侵掠魏境羅弘信伏兵攻之存信敗走洛州克用自將擊魏戰于洹水亡其子落落六月破魏成安洹水臨漳等十餘邑

十月又敗魏人于白龍潭進攻觀音門全忠救至乃解四年劉仁恭叛晉克用以兵五萬擊仁恭戰于安塞克用大敗光化元年朱全忠遣葛從周攻下邢洛磁三州克用遣周德威出青山口遇從周于張公橋德威大敗冬潞州守將薛志勤卒李罕之據潞州叛附于朱全忠二年全忠遣氏叔琮攻破承天軍又破遼州至于榆次周德威敗之于洞渦秋李嗣昭復取澤潞三年嗣昭敗汴軍于沙河復取洛州朱全忠自將圍之嗣昭走至青山口遇汴伏兵嗣昭大敗秋嗣昭取懷州是歲汴人攻鎮定鎮定皆絕晉以附于朱全忠天復元年全忠封梁王梁攻下晉絳河中執王

珂以歸晉失三與國乃下意為書幣聘梁以求和梁王以
為晉弱可取乃曰晉雖請盟而書辭慢因大舉擊晉四月
氏叔琮入天井張文敬入新口葛從周入土門王處直入
飛狐炭言入陰地叔琮取澤潞其別將白奉國破承天軍
遼州守將張鄂汾州守將李瑋皆迎梁軍降晉人大懼會
天大雨霖梁兵多疾皆解去五月晉復取汾州誅李瑋六
月周德威李嗣昭取慈隰二年進攻晉絳大敗于蒲縣梁
軍乘勝破汾慈隰三州遂圍太原克用大懼謀出奔雲州
又欲奔匈奴未決而梁軍大疫解去周德威復取汾慈隰
三州四年梁遷唐都於洛陽改元曰天祐克用以謂劫天
子以遷都者梁也天祐非唐號不可稱乃仍稱天復五年
會契丹阿保機於雲中約為兄弟六年梁攻燕滄州燕王
劉仁恭來乞師克用恨仁恭反覆欲不許其子存勗諫曰
此吾復振之時也今天下之勢歸梁者十七八彊如趙魏
中山莫不聽命是自河以北無為梁患者其所憚者惟我
與仁恭耳若燕晉合勢非梁之福也夫為天下者不顧小
怨且彼常困我而我急其難可因以德而懷之是謂一舉
而兩得此不可失之機也克用以為然乃為燕出兵攻破
潞州梁圍乃解去以李嗣昭為潞州留後七年梁兵十萬
攻潞州圍以夾城遣周德威救潞州軍于亂柳冬克用疾

是歲梁滅唐克用復稱天祐四年正月辛卯克用卒年五十三子存勗立葬克用於鴈門

嗚呼世久而失其傳者多矣豈獨史官之謬哉李氏之先蓋出於西突厥本號朱邪至其後世別自號曰沙陀而以朱邪為姓拔野古為始祖其自序云沙陀者北庭之磧也當唐太宗時破西突厥諸部分同羅僕骨之人於此磧置沙陀府而以其始祖拔野古為都督其傳子孫數世皆為沙陀都督故其後世因自號沙陀然予考于傳記其說皆非也夷狄無姓氏朱邪部族之號耳拔野古與朱邪同時人非其始祖而唐太宗時未嘗有沙陀府也唐太宗破西

突厥分其諸部置十三州以同羅為龜林都督府僕骨為金微都督府拔野古為幽陵都督府未嘗有沙陀府也當是時西突厥有鐵勒薛延陀阿史那之類為最大其別部有同羅僕骨拔野古等以十數蓋其小者也又有處月處密諸部又其小者也朱邪者處月別部之號耳太宗二十二年己降拔野古其明年阿史那賀魯叛至高宗永徽二年處月朱邪孤注從賀魯戰于牢山為契苾何力所敗遂沒不見後百五十年當憲宗時有朱邪盡忠及子執宜見於中國而自號沙陀以朱邪為姓矣蓋沙陀者大磧也在金莎山之陽蒲類海之東自處月以來居此磧號沙陀

突厥而夷狄無文字傳記朱邪又微不足錄故其後世自失其傳至盡忠孫始賜姓李氏後大而夷狄之人遂以沙陀為貴種云

五代史記卷第四

五代史記卷第五

唐本紀五

宋歐陽脩撰 徐無黨註

存勗克用長子也初克用破孟方立于邢州還軍上黨置酒三垂崗伶人奏百年歌至于衰老之際聲辭甚悲坐上皆悽愴時存勗在側方五歲克用慨然捋鬚指而笑曰吾行老矣此竒兒也後二十年其能代我戰于此乎存勗年十一從克用破王行瑜遣獻捷于京師昭宗異其狀貌賜以鷄鵠卮翡翠盤而撫其背曰兒有竒表後當富貴無忘予家及長善騎射膽勇過人稍習春秋通大義尤喜音聲歌舞俳優之戲天祐五年正月即王位于太原叔父克寧

殺都虞候李存質倖臣史敬鎔告克寧謀叛二月執而戕之且以先王之喪叔父之難告周德威德威自亂柳還軍太原梁夾城兵聞晉有大喪德威軍且去因頗懈王謂諸將曰梁人幸我大喪謂我少而新立無能為也宜乘其怠擊之乃出兵趨上黨行至三垂崗歎曰此先王置酒處也會天大霧晝暝兵行霧中攻其夾城破之梁軍大亂凱旋告廟九月蜀王王建岐王李茂貞及楊崇本攻梁大安晉亦遣周德威攻其晉州敗梁軍于神山六年劉知俊叛梁來乞師王自將至陰地關遣周德威攻晉州敗梁軍于蒙阮七年冬梁遣王景仁攻趙趙王王鎔來乞師諸將皆疑

鎔詐未可出兵王不聽乃救趙八年正月敗梁軍于柏鄉斬首二萬級獲其將校三百人馬三千匹進攻邢州不下留兵圍之去攻魏別遣周德威徇梁夏津高唐攻博州破東武朝城遂擊黎陽臨河淇門掠新鄉共城燕王劉守光聞晉攻梁深入乃大治兵聲言助晉王患之乃旋師七月會趙王王鎔于承天軍劉守光稱帝于燕九年正月遣周德威會鎮定以攻燕守光求救於梁梁軍攻趙屠棗彊李存審擊走之八月朱友謙以河中叛于梁來降梁遣康懷英討友謙友謙復臣于梁而亦陰附于晉十年十月劉守光請降王如幽州守光背約不降攻破之十一年殺燕王

劉守光于太原用其父仁恭于鴈門剖心以祭墓也於是趙王王鎔北平王王處直奉冊推王為尚書令始建行臺七月攻梁邢州戰于張公橋晉軍大敗十二年魏州軍亂賀德倫以魏博二州叛于梁來附王入魏州行至永濟誅其亂首張彥以其兵五百自衛號帳前銀鎗軍六月王兼領魏博節度使取德州七月取澶州劉鄩軍于洹水王率百騎覘其營遇鄩伏兵圍之數重決圍而出亡七八騎八月梁復取澶州晉軍與鄩對壘于莘晉軍數挑戰鄩閉壁不出十三年正月王留李存審于莘聲言西歸鄩聞晉王且去即引兵擊魏攻城東王行至貝州返擊鄩大敗之追至于故元

城又敗之鄩走黎陽三月攻梁衛州降其刺史來昭克磁州殺其刺史靳昭四月克洛州八月圍邢州降其節度使閻寶梁張筠弃相州戴思遠弃滄州而逃遂取二州貝州人殺梁守將張源德以城降契丹寇蔚州執振武節度使李嗣本十四年契丹寇新州遂寇幽州李嗣源擊走之冬梁謝彥章軍于楊劉十二月攻楊劉王自負芻以堙塹遂破之十五年正月梁晉相拒于楊劉彥章決河水以隔晉軍六月渡水擊彥章破其四寨八月大閱于魏合盧龍橫海昭義安國及鎮定之兵十萬馬萬匹軍于麻家渡謝彥章軍于行臺十二月進軍臨濮梁軍追之戰于胡柳晉軍

五代史卷五
唐本紀五
大敗周德威死之梁軍暮休于土山晉軍復擊大敗之遂
軍德勝為夾寨十六年正月王兼領盧龍軍節度使梁王
瓚攻德勝南城不克十月廣德勝北城十二月敗梁軍于
河南十七年朱友謙襲同州梁遣劉鄩擊友謙李存審敗
梁軍于同州十八年正月魏州僧傳真獻唐受命寶一趙
將張文禮弒其君鎔文禮來請命二月以文禮為鎮州兵
馬留後三月河中節度使朱友謙昭義軍節度使李嗣昭
橫海軍節度使李存審義武軍節度使王處直安國軍節
度使李嗣源鎮州兵馬留後張文禮領天平軍節度使閻
寶大同軍節度使李存璋振武軍節度使李存進匡國軍

節度使朱令德請王即皇帝位王三辭友謙等三請王曰
予當思之八月遣趙王王鎔故將符習及閻寶史建瑋等
攻張文禮於鎮州建瑋取趙州張文禮卒其子處瑾門城
拒守九月建瑋戰死十月梁戴思遠攻德勝北城李嗣源
敗之于戚城王處直叛附于契丹其子都幽處直以來附
十二月契丹寇涿州遂寇定州十九年正月敗契丹于新
城望都追奔至于幽州三月閻寶敗于鎮州以李嗣昭代
之四月嗣昭戰死以李存進代之八月梁取衛州九月存
進敗鎮人于東垣存進戰死十月李存審克鎮州王兼領
成德軍節度使

同光元年春三月李繼韜以潞州叛附于梁夏四月己巳

皇帝即位大赦改元國號唐行臺左丞相豆盧革為門下

侍郎右丞相盧程為中書侍郎同中書門下平章事

使郭崇韜昭義監軍張居翰為樞密使樞密使唐故以宦者為之其職甚微至此

始參用士人而與宰相確任鈞矣故與宰相並書以魏州為東京太原為西京鎮州為北

都閏月追尊祖考為皇帝妣為皇后曾祖執宜祖妣崔氏

皆謚曰昭烈廟號懿祖祖國昌祖妣秦氏皆謚曰文景廟

號獻祖考謚曰武廟號太祖立廟于太原自唐高祖太宗

懿宗昭宗為七廟追尊祖考則立廟可知故皆不書廟此書者以立高祖已下四廟故也此大事也舊史失其目

壬寅李嗣源取鄆州後唐太祖置義兒軍如李嗣昭等甚眾初皆賜姓名而不全若子故書李嗣源者書其所

賜姓名爾不以子書也與友文存珂異五月辛酉梁人取德勝南城六月及王彥

章戰于新壘敗之是月盧程罷秋八月梁人克澤州唐末澤潞皆屬

晉梁初已得澤州至此又屬晉而梁克之中間不見晉得澤州年月蓋舊史闕不書五代之亂戰爭攻取彼此得失不常多類此也守將

裴約死之九月戊辰李嗣源及王彥章戰于遞坊敗之冬

十月壬申如鄆州以襲梁掩其不備疾馳而入之故甲戌取中

都丁丑取曹州己卯滅梁敬翔自殺翔為梁臣梁所以亡唐翔之謀為多梁之亡也翔雖死之不書死而書自殺死大節也見不輕予人也丙戌貶鄭珏為萊州司戶參軍蕭頊登州

司戶參軍殺李振趙巖張漢傑朱珪滅其族己丑德音降

死罪囚流己下原之十一月乙巳復北都為鎮州太原為

北都丙辰復汴州為宣武軍丁巳尚書左丞趙光胤為中

書左丞趙光胤為中

書侍郎禮部侍郎韋說同中書門下平章事戊午新羅國王金朴英遣使者來辛酉復永平軍為西都甲子如洛京

洛京從當時語十二月庚午朔至自汴州辛巳李繼韜伏誅繼韜之

弟繼達殺其兄繼傳于潞州繼傳以被殺書非不予其死蓋繼達殺兄自當著其罪爾與書弒其君者同

壬辰畋于伊闕

二年春正月河南尹張全義及諸鎮進暖殿物己酉求唐

宦者凡書過惡辭無譏貶者直書其實而自見也庚戌新羅國王金朴英及其泉州

節度使王逢規皆遣使者來乙卯渤海國王大諲譔使大

禹謨來庚申如河陽迎皇太后也太后曹氏莊宗母也莊宗即位遣盧程奉冊為皇太后舊史實錄皆無奉冊月日故不

書辛酉至自河陽丁卯七廟神主至自太原祔于太廟朝

獻于太微宮戊辰享于太廟二月己巳朔有事于南郊大

赦癸酉群臣上尊號曰昭文睿武光孝皇帝戊寅幸李嗣

源第癸未立劉氏為皇后五代十三君立后者七辭有不同立得其正者曰以某妃某夫人某氏為皇后其不正者

直曰立某氏為皇后嫌與得正同爾無褒貶也三月己酉党項來庚戌賜從平汴州及

入洛南郊立仗軍士等功臣庚申工部郎中李塗為檢視

諸陵使唐諸帝陵也潞州將楊立反夏五月壬寅教坊使陳俊為

景州刺史內園栽接使儲德源為憲州刺史命官不書此書其甚也丙

辰渤海國王大諲譔遣使者來丙寅李嗣源克潞州不書命將舊史

闕六月丙子楊立伏誅己丑封回鶻王仁美為英義可汗

秋七月己酉如雷山賽天神夷狄之事也八月大霖雨河溢九月

壬子置水于城門以禳熒惑

本紀書灾不書異熒惑為置水非禮書爾見其有思禍之意而不知畏天

以修德水旱風蝗之類害物者灾也故書其變逆常理不知所以然者異也以其不可知故不書

甲寅幸郭崇韜第丙

辰黑水遣使者來冬十月癸未左熊威軍將趙暉妻一產

三男子

此亦變異而書者重人事故謹之後世以此為善祥故於亂世書以見不然

十一月癸卯畋于

伊闕丙午至自伊闕

書至見其留四日而荒甚

丁巳回鶻使都督安千想

來十二月庚午及皇后幸張全義第

三年春正月庚子如東京毀即位壇為鞠場二月己巳聚

鞠于新場乙亥射鴈于王莽河辛巳突厥渾解樓渤海國

王大諲譔皆遣使者來射鴈于北郊乙酉射鴨于郭泊庚

寅射鴈于北郊三月乙未寒食望祭于西郊

俚俗之祭也非禮故書

庚

申至自東京辛酉改東京為鄴都以洛京為東都夏四月

乙亥及皇后幸郭崇韜朱漢賓第旱庚寅趙光胤薨五月

丁酉皇太妃薨廢朝五日

太祖正室於莊宗為嫡母書太妃及輟朝見亂世禮壞而恩薄

己酉黑

水女真皆遣使者來六月辛未宗正卿李紆為昭宗少帝

改卜園陵使

少帝濟陰王也梁韋謏曰哀皇帝唐人謂之少帝從其本語

括馬秋七月壬寅皇

太后崩

不書用皇太后已見上注

八月癸未殺河南縣令羅貫九月庚子

魏王繼岌為西川四面行營都統郭崇韜為招討使以伐

蜀自六月雨至于是月丁巳射鴈于尖山冬十月壬午奚

吐渾突厥皆遣使者來戊子葬貞簡太后于坤陵十一月

丁未高麗遣使者來己酉蜀王衍降

唐兵入蜀不攻不戰君臣迎降故直書其實以見下書殺

行降為郭崇韜殺王宗弼及其弟宗渥宗訓滅其族十二月
 己卯畋于白沙癸未至自白沙閏月辛亥封弟存美為邕
 王存霸求王存禮薛王存渥申王存乂睦王存確通王存
 紀雅王

四年春正月壬戌降死罪以下囚甲子魏王繼岌殺郭崇
 韜及其三子于蜀實皇后劉氏作教與繼岌使殺崇韜而書繼岌殺者繼岌將兵在外教非天子命可止而不止

戊寅契丹使梅老鞋里來庚辰殺其弟睦王存乂及河中
 護國軍節度使李繼麟滅其族乙酉沙州曹義金遣使者
 來丙戌回鶻阿咄欲遣使者來丁亥殺李繼麟之將史武
 薛敬容周唐殷揚師太王景來仁白奉國皆滅其族二月

己丑宣徽南院使李紹宏為樞密使癸巳鄴都軍將趙在
 禮反于貝州反者皆不日獨在禮書日推迹其心可知爾其事具本傳蓋在禮初無亂心以是日見迫而反爾雖加以大惡之名猶原其本心而異於佗反者於此見凡書人善惡不妄加之也如此甲午畋于冷泉趙在禮陷鄴都

武寧軍節度使李紹榮討之邢州軍將趙太反東北面招
 討使李紹真討之甲辰成德軍節度使李嗣源討趙在禮
 三月趙太伏誅李嗣源反博州守將翟建自稱刺史甲子
 殺王衍滅其族許其不死降而殺之又滅其族於殺非罪此為甚而書無異辭者前書衍降義自見也乙丑如

汴州壬申次滎澤龍驤指揮使姚彥溫以前鋒軍叛降于
 李嗣源嗣源入于汴州甲戌至自萬勝帝至萬勝鎮聞嗣源已入汴州乃還從
 馬直指揮使郭從謙反夏四月丁亥朔皇帝崩年四十三帝尸為伶人焚

五代史第五
唐本紀五
之明宗入洛得其骨燼天成元年七月葬之河南新安縣
號雍陵至晉避廟諱更曰伊陵其不書葬與梁太祖同

五代史記卷第五

五代史記卷第六

唐本紀六

宋歐陽脩撰 徐無黨註

明宗聖德和武欽孝皇帝世本夷狄無姓氏父霓為鴈門
部將生子邈佶烈以騎射事太祖為人質厚寡言執事恭
謹太祖養以為子賜名嗣源梁攻交鄆朱宣朱瑾來乞師
太祖遣李存信將兵三萬救之存信留莘縣不進使嗣源
別以兵三千先擊梁兵梁兵解去存信留莘縣久之為羅
弘信所襲存信敗走嗣源獨殿而還太祖以嗣源所將騎
五百號橫衝都光化三年李嗣昭攻梁邢洛出青山遇高
從周兵嗣昭大敗走梁兵追之嗣源從間道後至謂嗣昭

曰為公一戰乃解鞍礪鏃憑高為陣左右指畫梁追兵望之莫測嗣源急呼曰吾取葛公士卒可無動乃馳騎犯之出入奮擊嗣昭繼進梁兵解去嗣源身中四矢太祖解衣賜藥以勞之由是李橫衝名重四方梁晉相拒于柏鄉梁龍驤軍以赤白馬為兩陣旗幟鎧仗皆如馬色晉兵望之皆懼莊宗舉鍾以飲嗣源曰卿望梁家赤白馬思乎雖吾亦怯也嗣源笑曰有其表爾翌日歸吾廐也莊宗大喜曰卿當以氣吞之因舉鍾飲酣奮搥馳騎犯其白馬挾二裨將而還梁兵敗以功拜代州刺史莊宗攻劉守光嗣源及李嗣昭將兵三萬別出飛狐定山後取武媯儒三州莊宗

已平魏州因徇下磁相拜相州刺史昭德軍節度使久之徙鎮安國契丹攻幽州莊宗遣嗣源與閻寶等擊走之同光元年徙鎮橫海是時梁唐相拒于河上李繼韜以潞州叛降梁莊宗有憂色召嗣源帳中謂曰繼韜以上黨降梁而梁方急攻澤州吾出不意攻其鄆州以斷梁右臂可乎嗣源對曰夾河之兵久矣苟非出奇則大事不決臣請獨當之乃以步騎五千涉濟至鄆州鄆人無備遂襲破之即拜天平軍節度使蕃漢馬步軍副總管梁軍攻破德勝南柵莊宗退保楊劉王彥章急攻鄆州莊宗悉軍救之嗣源為前鋒擊敗梁軍追至中都擒彥章及梁監軍張漢傑彥

章雖敗而段凝悉將梁兵屯河上莊宗未知所嚮諸將多
言乘勝以取青齊嗣源曰彥章之敗凝猶未知使其聞之
凝遲定計亦須三日縱使料吾所向亟發救兵必渡黎陽
數萬之衆舟楫非一日具也此去汴州不數百里前無險
阻方陣而行信宿可至汴州已破段凝豈足顧哉而郭崇
韜亦勸莊宗入汴莊宗以為然遣嗣源以千騎先至汴攻
封丘門王瓚開門降莊宗後至見嗣源大喜手攬其衣以
頭觸之曰天下與爾共之拜中書令二年莊宗祀天南郊
賜以鐵券五月破楊立于潞州六月徙鎮宣武兼蕃漢內
外馬步軍總管冬契丹侵漁陽嗣源敗之于涿州三年徙

鎮成德莊宗幸鄴請朝行在不許貞簡太后疾請入省又
不許太后崩請赴山陵許之而契丹侵邊乃止十二月遂
朝于洛陽

天成元年

實同光四年而書天成元年者大赦改元文見下可知莊宗本紀自書同光四年各從其所稱既曰改元不嫌二號也

郭崇韜朱友謙皆以讒死嗣源以名位高亦見疑忌趙在
禮反於魏大臣皆請遣嗣源討賊莊宗不許羣臣屢請莊
宗不得已遣之三月壬子嗣源至魏屯御河南在禮登樓
謝罪甲寅軍變嗣源入于魏與在禮合夕出止魏縣丁巳
以其兵南遣石敬瑭將三百騎為先鋒嗣源行過鉅鹿掠
小坊馬二千匹以益兵壬申入汴州四月丁亥莊宗崩已

丑入洛陽甲午監國朝羣臣于興聖宮乙未中門使安重

誨為樞密使殺元行欽及租庸使孔謙壬寅左驍衛大將

軍孔循為樞密使丙午始奠于西宮日始奠見其緩也自己丑入洛至此二十日矣皇

帝即位于柩前柩前即位嗣君之禮也反逆之臣自立而用嗣君之禮書從其實而不變文者蓋先已書反正其罪矣此

書其實者見其猶存自愧之心而欲逃大惡之名也易斬縗以袞冕既用嗣君之禮矣遽釋縗而服冕故書以見其情詐

壬子魏王繼岌薨諸王薨不書此書者見明宗舉兵實反會從謙弒逆遂託赴難為名及即位時莊宗元子猶在則其

辭屈甲寅大赦改元渤海國王大誣譔使大陳林來是月

張居翰罷五月丙辰朔太子賓客鄭珏工部尚書任圜為

中書侍郎同中書門下平章事戊辰趙在禮為義成軍節

度使在禮始亂宜誅而明宗因之以反命以方鎮報其功也故書六月丁酉汴州控鶴軍亂指

揮使張諫殺其權知州事高逖己亥諫伏誅秋七月庚申

安重誨殺殿直馬延于御史臺門御史臺所以糾百官之不契丹

使梅老述骨來渤海使大昭佐來己卯貶豆盧革為辰州

刺史韋說叙州刺史甲申流革于陵州說于合州八月乙

酉朔陝州破石縣民高存妻一產三男子丁酉以象笏三

十二賜百官之無笏者見時朝廷衰弱之甚故書閱稼于冷泉宮己亥契

丹寇邊丁未平盧軍節度使霍彥威殺其登州刺史王公

儼甲寅醫官張志忠為太原少尹九月己未幸至德宮及

袁建豐第冬十月丁亥雲南山後兩林百蠻都鬼主右武

衛大將軍李卑晚使大鬼主傳能何華來辛丑契丹使沒

契丹使沒

骨餒來告阿保機哀廢朝三日旱辛亥雨

二年春正月癸丑朔更名亶癸亥端明殿學士兵部侍郎

馮道太常卿崔協為中書侍郎同中書門下平章事二月

壬午朔新羅使張芬來西川節度使孟知祥殺其兵馬都

監李嚴丙申赦京師囚郭從謙為景州刺史既而殺之從謙弒君

不討而命以官故書與在禮同罪宜誅而書殺者明宗亦同罪不得行誅故以相兩殺書之 戊戌山南東道節度

使劉訓為南面招討使以伐荆南是時荆南自絕於中國而附吳不足以有罪不書討而書

伐見非內臣不責其叛 三月壬子朔幸會節園群臣買宴游幸若不過度則小事也皆不

書惟莊宗及晉出帝之世則書者著其過度耳明宗於五代勤儉之君游幸無過度此書以著買宴見君臣之失 盧臺軍亂殺

其將烏震新羅林彥來夏四月庚寅盧臺軍將龍旺等伏

誅六月丙戌任圜罷庚子辛白司馬坡祭突厥神夷狄之事也

秋七月甲子隨州刺史西方鄴取夔忠萬州癸酉殺豆盧

革韋說八月乙酉祥柯使宋朝化及昆明使者來九月庚

午党項使如連山來壬申契丹使梅老來冬十月乙酉如

汴州宣武軍節度使朱守殷反馬步軍都指揮使馬彥超

死之己丑守殷自殺不書克汴州者天子自以兵討未嘗攻戰直入其城也他自殺不書為書克州此不書克州故

書自 乙未殺太子少保致仕任圜實安重誨矯詔殺之不書重誨殺者明宗知而不責又下

詔書誣圜以罪故以明宗自殺書之 辛丑德釋輕繫囚是月傳箭于霍彥威夷狄之事也

十一月乙亥契丹使梅老來十二月己丑回鶻西界吐蕃

遣使者來甲辰畋于東郊丙午追尊祖考為皇帝妣為皇

后高祖聿謚曰孝恭廟號惠祖祖妣劉氏謚曰孝恭昭曾
祖教謚曰孝質廟號毅祖祖妣張氏謚曰孝質順祖琰謚
曰孝靖廟號烈祖祖妣何氏謚曰孝靖穆考謚曰孝成廟
號德祖妣劉氏謚曰孝成懿立廟于應州

三年春正月丁巳契丹陷平州二月辛巳吐渾都督李紹
虜來乙未孔循罷戊戌回鶻使李阿山來三月丁未朔御
札求直言己未鄭珽罷癸亥成德軍節度使王建立為尚
書右僕射同中書門下平章事西方鄴克歸州戊辰宣徽
南院使范延光為樞密使夏四月戊寅延光罷乙酉達靺
遣使者來義武軍節度使王都反壬寅歸德軍節度使王

晏球為北面行營招討使五月契丹禿餒入于定州辛酉
右衛上將軍趙敬怡為樞密使封回鶻可汗王仁裕為順
化可汗秋七月己未殺齊州防禦使曹廷隱八月盧龍軍
節度使趙德鈞執契丹首領惕隱赫邈慶州防禦使竇廷
琬反冬十月靜難軍節度使李敬周討之丁巳突厥使張
慕晉來十一月壬午吐渾使念九來甲午王建立罷十二
月李敬周克慶州竇廷琬伏誅辛亥幸康義誠第

四年春正月壬辰回鶻使掣撥都督來二月癸卯王晏球

克定州

王都自焚故
不書伏誅

辛酉晏球獻馘俘趙敬怡薨丁卯崔協

薨庚午至自汴州三月丙戌殺姪從璨夏四月契丹寇雲

州癸丑契丹使捺括梅里來求禿餒殺之甲寅端明殿學士尚書兵部侍郎趙鳳為門下侍郎兼工部尚書同中書

門下平章事五月己巳朝群臣賀朔不曰視朝而曰賀朔者非禮視朝常事自不書爾五月

月賀朔出於道家之說自唐以來用之書之見亂世舉非禮之不急者此禮其後屢行皆不復書者與入閣同乙酉追謚少

帝曰昭宣光烈孝皇帝契丹寇雲中秋七月壬申殺右金

吾衛上將軍毛璋八月乙巳黑水使骨至來丁未吐渾首

領念公山來乙卯党項折遇明來己未高麗王建使張彬

來九月癸巳殺供奉官烏昭遇冬十二月辛丑殺西平縣

令李商

長興元年春正月丁卯閱馬于苑辛卯宣徽南院使朱弘

昭為大內留守二月戊戌黑水兀兒遣使者來乙巳天雄

軍節度使石敬瑭為御營使癸丑朝獻于太微宮甲寅享

于太廟乙卯有事于南郊大赦改元三月庚寅立淑妃曹

氏為皇后夏四月戊戌安重誨使河中衙內指揮使楊彥

溫逐其節度使從珂壬寅西京留守索自通侍衛步軍指

揮使藥彥稠討之辛亥自通執彥溫殺之彥溫雖有罪有命獲而勿殺自通擅

殺之故不書誅而書殺戊午群臣上尊號曰聖明神武文德恭孝皇帝

辛酉吐蕃首領干撥葛來五月丁丑回鶻使孽粟祖來庚

辰回鶻使安黑連來秋七月壬午訪莊宗子孫莊宗子孫

而不知瘞所見明宗舉兵不順禍害所罹者八月乙未忠武軍節

度使張延朗為三司使三司使始於此而今遂因之壬寅殺捧聖都軍使

李行德大將張儉滅其族吐渾來附封子從榮為秦王戊

申海州將王傳極殺其刺史陳宣叛于吳來降乙卯吐渾

使康合畢來丙辰封子從厚為宋王九月壬戌吐蕃使王

滿儒來東川節度使董璋反甲申成德軍節度使范延光

為樞密使丁亥石敬瑭為東川行營都招討使冬十月丁

酉始藏冰甲辰驍衛上將軍致仕張筠進助軍粟乙巳董

璋陷閬州殺節度使李仁矩指揮使姚洪死之孟知祥反

十一月庚申朔秦王從榮受冊謁于太廟冊禮廢於亂世至此始一行之故書丙

戌契丹東丹王突欲來奔夷狄不可以禮義責故不曰叛于契丹十二月丁未二

王後祕書丞鄴國公揚仁距卒廢朝一日丁巳回鶻順化

可汗王仁裕使程末斯來安重誨討董璋不命將名直以樞密使往沙州

曹義金遣使者來

二年春正月戊辰党項使折七移來庚辰達靺使列六薛

孃居來二月丁酉幸安元信第戊戌突厥使杜阿熟吐渾

使康萬琳來辛丑安重誨罷三月趙鳳罷丁亥太常卿李

愚為中書侍郎同中書門下平章事夏四月甲辰宣徽北

院使趙延壽為樞密使甲寅董璋陷遂州武信軍節度使

夏魯哥死之乙卯以旱赦流罪以下囚閹五月丁酉殺太

子太師致仕安重誨及其妻張氏子崇贊崇緒秋八月己

酉

酉

酉

未契丹使邪姑兒來九月丁亥放五坊鷹隼冬十一月戊

申吐蕃遣使者來辛丑旌表棣州民刑釗門閭干戈之世王道息而禮義

亡民猶有自知孝悌而時君旌表猶有勸民之意故兩善而書之十二月甲寅朔除鐵禁初稅農

具錢至今因之故書己未西涼府遣使者來己巳回鶻使安永思來

辛未渤海使文成角來党項寇方渠

三年春正月庚子契丹使拽骨來己酉渤海回鶻皆遣使

者來二月己卯靜難軍節度使藥彥稠及党項戰于牛兒

谷敗之三月甲申契丹遣使者來夏四月庚申新羅遣使

者來五月己丑二王後詹事司直楊延紹襲封鄴國公丙

午孟知祥攻董璋陷綿州六月甲寅封王建為高麗國王

大義軍使孟知祥殺董璋陷東川達靺首領頡哥以其族

來附秋八月己卯吐蕃遣使者來冬十月庚申幸石敬瑭第

四年春正月庚寅端明殿學士兵部侍郎劉昫為中書侍

郎同中書門下平章事二月戊午孟知祥使朱滉來十國外而不書

此書者知祥本唐臣而反至此改過自歸絕之則嫌不許其自新錄之則尚冀其遷善然其來也臣禮不備故如表狄書之三月甲

辰追册晉國夫人夏氏為皇后夏五月戊寅封子從珂為

潞王從珂非子而書子與梁博王友文同從益許王姪從温兗王從璋洋王從敏

涇王丙戌契丹使述骨卿來秋七月乙未回鶻都督李末

來獻白鶻命放之八月戊申大赦九月戊戌趙延壽罷山

南東道節度使朱弘昭為樞密使冬十月庚申范延光罷

三司使馮贇為樞密使壬申幸士和亭得疾書得疾為從十

一月壬辰秦王從榮以兵入興聖宮不克伏誅君病不侍疾

當誅故書伏誅其意以謂帝崩矣思乙未侍衛親軍都指揮使康

義誠殺三司使孫岳戊戌皇帝崩于雍和殿年六十七清泰

陽縣號徽陵雖得其死而為賊所葬故亦不書葬

嗚呼自古治世少而亂世多三代之王有天下者皆數百

年其可道者數君而已况於後世邪况於五代邪予聞長

老為予言明宗雖出夷狄而為人純質寬仁愛人於五代

之君有足稱也嘗夜焚香仰天而祝曰臣本蕃人豈足治

天下世亂久矣願天早生聖人自初即位減罷宮人伶官

廢內藏庫四方所上物悉歸之有司廣壽殿火災有司理

之請丹雘喟然嘆曰天以火戒我豈宜增以侈邪歲嘗旱

已而雪暴坐庭中詔武德司宮中無得掃雪曰此天所以

賜我也數問宰相馮道等民間疾苦聞道等言穀帛賤民

無疾疫則欣然曰吾何以堪之當與公等作好事以報上

天吏有犯賊輒寘之死曰此民之蠹也以詔書褒廉吏孫

岳等以風示天下其愛人恤物盖亦有意於治矣其即位

時春秋已高不遜聲色不樂遊畋在位十年於五代之君

最為長世兵革粗息年屢豐登生民實賴以休息然夷狄

性果仁而不明屢以非辜誅殺臣下至於從榮父子之間

不能慮患為防而變起倉卒陷之以大惡帝亦由此飲恨而終當是時大理少卿康澄上疏言時事其言曰為國家者有不足懼者五深可畏者六三辰失行不足懼天象變見不足懟小人訛言不足懼山崩川竭不足懼水旱蟲蝗不足懼也賢士藏匿深可畏四人遷業深可畏上下相徇深可畏廉耻道消深可畏毀譽亂真深可畏直言不聞深可畏也識者皆多澄言切中時病若從榮之變任圜安重誨之死可謂上下相徇而毀譽亂真之蔽矣然澄之言豈止一時之病凡為國者可不戒哉

五代史記卷第六

五代史記卷第七

唐本紀七

宋歐陽脩撰 徐無黨註

愍皇帝明宗第五子從厚也為人形質豐厚寡言好禮明宗以其貌類已特愛之天成二年以檢校司徒拜河南尹判六軍諸衛事加檢校太保同中書門下平章事從厚妃孔循女也安重誨怒循以女妻從厚二年罷循樞密使出從厚為宣武軍節度使明年徙鎮河東長興元年封從厚宋王徙鎮成德二年徙鎮天雄累加兼中書令四年十一月秦王從榮伏誅明宗病甚遣宦者孟漢瓊召王于鄴而明宗崩祕其喪六日十二月癸卯朔發喪于西宮皇帝即

位于柩前羣臣見於東階復于喪位丙午成服于西宮代

五君於此始見嗣君即位服喪之事先君得其終嗣君得其始而免禍亂於臣民於篡亂之世稀見之事也故特可書之

庚戌登

光政門樓存問軍民辛亥殺司衣王氏癸丑始聽政乙卯殺司儀康氏丁巳馮道為大行皇帝山陵使戶部尚書韓

彥輝為副中書舍人王延為判官禮部尚書王權為禮儀

使兵部尚書李璘為鹵簿使御史中丞龍敏為儀仗使左

僕射權判河南府盧質為橋道頓遞使丁卯禪

應順元年春正月壬申朔視朝于廣壽殿禮著非也乙亥契丹

使都督沒辣于來戊寅大赦改元用樂回鶻可汗王仁美

遣使者來沙州瓜州遣使者來乙未朱弘昭馮贇獻錢助

作山陵閏月丙午冊皇太后不書姓氏不曰冊某人為皇太后者母尊不可斥其事自見於傳也

甲寅冊太妃王氏北京留守石敬瑭獻銀絹助作山陵二

月庚寅視作山陵鳳翔節度使潞王從珂反辛卯西京留

守王思同為西面行營都部署靜難軍節度使藥彥稠為

副三月丙辰思同兵潰嚴衛指揮使尹暉羽林指揮使楊

思權以其軍叛降于從珂辛酉殺侍衛親軍馬軍都指揮

使朱弘實癸亥河陽三城節度使康義誠為鳳翔行營都

招討使王思同為副西京副留守劉遂雍叛降于從珂思

同奔歸于京師不克死之丁卯京城巡檢使安從進叛殺

馮贇朱弘昭自殺從進傳其二首于從珂戊辰如衛州不書

帝崩者當於廢帝
紀書弒鄂王也

廢帝鎮州平山人也本王氏其世微賤母魏氏少寡明宗
為騎將過平山掠得之魏氏有子阿三已十餘歲明宗養
以為子名曰從珂及長狀貌雄偉謹信寡言而驍勇善戰
明宗甚愛之自晉兵戰梁于河上從珂常立戰功莊宗呼
其小字曰阿三不徒與我同年其敢戰亦類我同光二年
為衛州刺史突騎指揮使戍于石門明宗討趙在禮自魏
反兵而南從珂率戍兵自曲陽孟縣馳出常山以追明宗
明宗之南也兵少得從珂兵在後而軍聲大振明宗入立
拜從珂河中節度使封潞王是時明宗春秋已高王於諸

子次最長樞密使安重誨患之乃矯詔河中裨將楊彥溫
使圖之王閱馬于黃龍莊彥溫即閉門拒之王止于虞鄉
以聞明宗召王還京師居之清化里第重誨數請行軍法
明宗不聽後重誨見殺乃起王為左衛大將軍西京留守
長興三年為鳳翔節度使王子重吉自明宗時典禁兵為
控鶴指揮使愍帝即位朱弘昭馮贇用事乃罷重吉兵職
出為亳州團練使又徙王為北京留守不降制書而宣授
文以李從璋為代初安重誨得罪罷河中以存璋為代而
重誨見殺故王益自疑遂據城反愍帝遣王思同會諸鎮
兵討之思同戰敗走諸鎮兵皆潰

清泰元年三月丁巳王以兵東庚申次長安西京副留守
劉遂雍叛于唐來降甲子次華州執藥彥稠丙寅次靈寶
河中安彥威陝州康思立叛于唐來降己巳次陝州康義
誠叛于唐來降殺宣徽使孟漢瓊愍帝出居于衛州夏四
月壬申入京師馮道率百官迎王于蔣橋王辭不見入哭
于西宮遂見群臣道拜王荅拜入居于至德宮癸酉以太
后令降天子為鄂王命王監國乙亥皇帝即位丙子率河
南民財以賞軍丁丑借民房課五月以賞軍戊寅弒鄂王
義與弒濟陰正同 慈州刺史宋令詢死之乙酉大赦改元戊子殺康
義誠及藥彥稠義誠叛于愍帝罪宜曰誅而廢帝同惡相殺故書殺 五月丙午端明殿

學士左諫議大夫韓昭胤為樞密使莊宅使劉延朗為樞
密副使庚戌馮道罷天雄軍節度使范延光為樞密使甲
寅賜勸進選人宗子官六月庚辰幸范延光及索自通第
秋七月辛亥太常卿盧文紀為中書侍郎同中書門下平
章事丁巳立沛國夫人劉氏為皇后八月辛未尚書左丞
姚顛為中書侍郎同中書門下平章事許御署官選御署官疑
是廢帝初舉兵時所置之官以其非吏部正授故須有旨方得
選此於事無勸戒不必書以舊史不詳故存所不知慎傳疑也 九
月契丹寇邊冬十月戊寅李愚劉昫罷十二月乙亥雄武
軍節度使張延朗為中書侍郎同中書門下平章事契丹
寇雲州庚寅幸龍門旱

二年春二月甲戌范延光罷己丑追尊魯國大夫人魏氏為皇太后非嫡母故詳其爵氏三月辛丑忠武軍節度使趙延壽為樞

密使夏五月辛卯宣徽南院使劉延皓為樞密使契丹寇邊六月癸未群臣獻添都馬都者軍伍之名秋七月丁酉回鶻可

汗王仁美使其都督陳福海來劉延皓罷九月己酉刑部尚書房嵩為樞密使乙卯渤海遣使者來

三年春正月乙未百濟遣使者來丁未封子重美為雍王三月丙午翰林學士禮部侍郎馬胤孫為中書侍郎同中

書門下平章事河東節度使石敬瑭反夏五月乙卯建雄軍節度使張敬達為太原四面都招討使義武軍節度使

楊光遠為副戊申先鋒指揮使安審信叛降于石敬瑭己酉振武戍將安重榮叛降于石敬瑭壬子天雄軍屯駐捧

聖都虞候張令昭逐其節度使劉延皓六月癸亥以令昭為右千牛衛將軍權知天雄軍府事佗命官不書以此書以者明令昭猶可以甲戌

宣武軍節度使范延光為天雄軍四面招討使秋七月戊申克魏州壬子張令昭伏誅癸丑彰聖指揮使張萬迪叛

降于石敬瑭八月戊午契丹使梅里來九月甲辰張敬達及契丹戰于太原敗績契丹圍敬達于晉安戊申如河陽

冬十月壬戌括馬籍民為兵十一月戊子盧龍軍節度使趙德鈞為行營都統丁酉契丹立晉閏月甲子楊光遠殺

張敬達以其軍叛降于契丹敬達不書死之而書殺者敬達大將宜以義責光遠而誅之雖不果

而見殺猶為得死乃諷光遠甲戌契丹及晉人至于潞州丁丑命葬其燼骨於徽陵域中

至自河陽辛巳皇帝崩年五十三帝自焚死晉高祖

嗚呼君臣之際可謂難哉蓋明者慮於未萌而前知暗者

告以將及而不懼故先事而言雖忠而不信事至而悔其

可及乎重誨區區獨見潞王之禍而謀之不藏至於殞身

赤族其隙自茲及愍帝之亡也穴於徽陵其土一壠路人

見者皆為之悲使明宗為有知其有媿於重誨矣哀哉

五代史記卷第七

五代史記卷第八

晉本紀八

宋歐陽脩撰 徐無黨註

高祖聖文章武明德孝皇帝其父臬揆鷄本出於西夷自

朱邪歸唐從朱邪入居陰山其後晉王李克用起於雲朔

之間臬揆鷄以善騎射常從晉王征伐有功官至洛州刺

史臬揆鷄生敬瑭其姓石氏不知得其姓之始也敬瑭為

人沈厚寡言明宗愛之妻以女是為永寧公主由是常隸

明宗帳下號左射軍莊宗已得魏梁將劉鄩急攻清平莊

宗馳救之兵未及陣為鄩所掩敬瑭以千餘騎橫槊馳擊

取之以旋莊宗拊其背而壯之手啗以酥啗酥夷狄所重

由是名動軍中十五年莊宗戰於胡柳前鋒周德威戰死
敬瑭以左軼軍從明宗復擊敗梁兵明宗戰胡盧套楊村
為梁兵所敗敬瑭常脫明宗於危趙在禮之亂明宗討之
至魏而兵變明宗初欲自歸于天子明已所以不反者敬
瑭獻計曰豈有軍變於外上將獨無事者乎且猶豫者兵
家大忌不如速行願得騎兵三百先攻汴州夷門天下之
要害也得之可以成事明宗然之與之驍騎三百渡黎陽
為前鋒明宗遂入汴莊宗自洛後至不得入而兵皆潰去
莊宗西還明宗以敬瑭為前鋒趣汜水且收其散卒莊宗
遇弒明宗入立拜敬瑭保義軍節度使賜號竭忠建策興

復功臣兼六軍諸衛副使在陝為政以廉聞是時諸侯多
不奉法鄧州陶玘亳州李鄴皆以賊汙論死明宗下詔書
褒廉吏普州安崇阮洛州張萬進耀州孫岳等以諷天下
而以敬瑭為首天成二年十月從幸汴州為御營使拜宣
武軍節度使侍衛親軍馬步軍都指揮使六軍副使如故
改賜耀忠匡定保節功臣三年四月徙鎮天雄拜同中書
門下平章事興唐尹五月拜駙馬都尉董璋反東川為行
營都招討使不克而還復兼六軍諸衛副使徙鎮河陽三
城未行而契丹吐渾突厥皆入寇是時秦王從榮統六軍
敬瑭疑其必及禍不欲為其副乃自請行及制出不樂副

使輒復辭行明宗數責大臣問誰可行者范延光趙延壽等卒以敬瑭為請乃拜河東節度使大同彰國振武威塞等軍蕃漢馬步軍摠管落六軍副使乃行明年明宗崩愍帝即位加中書令三月徙鎮成德清泰元年五月復鎮太原來朝京師潞王從珂反於鳳翔愍帝出奔遇敬瑭于道敬瑭殺帝從者百餘人幽帝于衛州而去廢帝即位疑敬瑭必反

天福元年五月徙鎮天平敬瑭果不受命謂其屬曰先帝受吾太原使老馬今無故而遷是疑吾反也且太原地險而粟多吾當內檄諸鎮外求援於契丹可乎棗維翰劉知

遠等共以為然乃上表論廢帝不當立請立許王從益為明宗嗣廢帝下詔削奪敬瑭官爵命張敬達等討之敬瑭求援於契丹九月契丹耶律德光自鴈門入與唐兵戰敬達大敗敬瑭夜出北門見耶律德光約為父子十一月丁酉皇帝即位於廢帝本紀書契丹立晉據所見也於此書皇帝即位以自立為文原其心也晉高祖之反無契丹之助亦必自立蓋其志在於為帝故使自任其惡也國號晉以幽涿薊檀順瀛漢蔚朔雲

應新媯儒武寰州入于契丹己亥大赦改元掌書記棗維翰為翰林學士尚書禮部侍郎知樞密使事閏月丙寅翰林學士承旨尚書戶部侍郎趙瑩為門下侍郎棗維翰為中書侍郎同中書門下平章事兼樞密使甲戌趙德鈞及

其子延壽叛于唐來降契丹鏖之以歸己卯次河陽節度使
使長從簡叛于唐來降是日廢帝由在辛巳至自太原盧文紀姚

顛罷甲申大赦殺張延朗劉延朗赦房暉十二月乙酉如
河陽追降王從珂為庶人王從珂從晉人本語丁亥司空馮道兼門下

侍郎同中書門下平章事己丑曹州指揮使石重立殺其
刺史鄭玩辛卯御札求直言癸巳鎮州大內都虞候祕瓊

逐其節度副使李彥珂同州裨將門鐸殺其將楊漢賓庚
子天平軍節度使王建立殺其副使李彥贊旱

二年春正月癸亥安遠軍節度使盧文進叛降于吳丁卯
天雄軍節度使范延光殺齊州防禦使祕瓊戊寅兵部侍

郎李崧為中書侍郎同中書門下平章事樞密使封唐宗

室子為公及隋鄴公為二王後以周介公備三恪唐宗室子史失其名

書之以見二王後三恪猶存不必著其人也二月丁酉契丹使皇太子解里來三月
庚辰如汴州夏四月丁亥赦囚蠲民租賦趙瑩使于契丹

辛卯宣武軍節度使楊光遠進助國錢契丹使宮苑使李
可興來五月壬戌御札求直言丁丑追尊祖考為皇帝妣

為皇后高祖璟謚曰孝安廟號靖祖祖妣秦氏謚曰孝安
元曾祖郴謚曰孝簡廟號肅祖祖妣安氏謚曰孝簡恭祖

昱謚曰孝平廟號睿祖祖妣來氏謚曰孝平獻考紹雍謚
曰孝元廟號獻祖妣何氏謚曰孝元懿六月癸未契丹使

夷離畢來天雄軍節度使范延光反丁酉傳箭于義成軍
節度使符彥饒丁未楊光遠為魏府四面行營都部署東
都巡檢張從賓反留守判官李遐死之奉國都指揮使侯
益護聖都指揮使杜重威討之從賓寇河陽殺皇子重义
寇河南殺皇子重信秋七月從賓陷汜水關殺巡檢使宋
廷浩壬子右衛大將軍尹暉叛奔于吳不克伏誅右監門
衛大將軍婁繼英叛降于張從賓義成軍亂殺戍將侍衛
馬步軍都指揮使白奉進甲寅戍將奉國指揮使馬萬執
符彥饒歸于京師命殺之于赤岡彥饒雖有縱軍之罪被誣以
反而見殺故不書誅曰命殺
乙卯楊光遠為魏府行營都招討使辛酉杜重威克
擅殺嫌萬

汜水關張從賓投河死
故不書伏誅壬申楊光遠克博州丙子安州屯防

指揮使王暉殺其節度使周瓌右衛大將軍李金全討之

金全未至而暉走見殺故不書
暉反不書克安州不書暉誅八月丙申靜難軍節度使安

叔千進添都馬乙巳赦非死罪囚及張從賓符彥饒王暉

餘黨九月楊光遠進粟冬十月辛巳禁造甲兵

三年春二月戊戌諸鎮皆進物以助國殘民以獻其上君臣同
欲賄賂公行至此而不

勝其多矣故摠言諸
鎮此後不復書矣三月壬戌回鶻可汗王仁美使翟全福

來丁丑禁私造銅器秋七月辛酉以皇業錢作受命寶寶作

不必書皇業錢者私錢
也天子畜私錢故書八月戊寅馮道及左僕射劉昫為契

丹冊禮使壬午澶州刺史馮暉降丙戌許御署官選己丑

蜀水旱民稅辛丑歸伶官于契丹高祖以父事契丹其有所求不日與而曰歸者若輸之也

九月己酉赦范延光初延光請降高祖不許延光遂堅壁攻之久不克悔而赦之故不書降己未

歸靜鞭官劉守威金吾勘契官王殷司天鷄叫學生殷暉

于契丹于闐使馬繼榮來回鶻使李萬金來己巳赦魏州

蜀民稅是月宣徽南院使劉處讓為樞密使冬十月戊寅

契丹使中書令韓頻來奉冊曰英武明義皇帝庚辰升汴

州為東京以洛陽為西京雍州為晉昌軍戊子右金吾衛

大將軍馬從斌使于契丹己未契丹使梅里來戊戌大赦

庚子封李聖天為大寶于闐國王十一月辛亥升廣晉府

為鄴都壬戌除鑄錢令十二月丙子封子重貴為鄭王

四年春正月盜發唐愍皇帝墓愍帝附于明宗徽陵域中無陵名故曰墓晉高祖即位追謚為愍皇帝五代諸帝謚號不可為法皆不足道惟愍帝宜書者嫌常降為鄂王也而國亡禮闕舊史實錄皆無奏謚上冊月日故雖當書而不得因事而見於此辛亥澶州防禦使張從恩為樞密副使旌

表深州民李自倫門閭三月乙巳回鶻使其都督拽里敦

來丙辰頒調元曆靈州戍將王彥忠以懷遠城反己未彥

忠降供奉官齊延祚殺之夏四月辛巳封回鶻可汗王仁

美為奉化可汗甲申廢樞密使秋七月丙辰復禁鑄錢閏

月壬申桑維翰罷八月己亥朔河決博平西戎寇涇州彰

義軍節度使張彥澤敗之執其首領野离羅蝦獨九月丁

丑契丹使粘木孤來癸未封李從益為郇國公以奉唐後

帝

帝

帝

丙戌高麗王建使其廣評侍郎邢順來冬十一月乙亥立
唐高祖太宗莊宗明宗愍帝廟于西京戊子契丹使遙折
來吐蕃罷延族來附

五年春正月丁卯朔德音除民公私債己丑回鶻使石海
金來夏四月甲子契丹興化王來五月丙戌安遠軍節度
使李金全叛附于唐六月癸卯李昇遣其將李承裕入于
安州金全奔于唐安遠軍節度使馬全節及承裕戰敗之
丁巳克安州承裕奔于雲夢全節執而殺之秋八月丁酉
閔稼于西郊己未西京留守楊光遠殺太子太師范延光
九月丁卯翰林學士承旨戶部侍郎和凝為中書侍郎同

中書門下平章事辛巳閔稼于沙臺冬十月丁未契丹使
舍利來十一月丙子冬至始用二舞

六年春正月戊寅封唐叔虞為興安王臺駘為昌寧公二
月戊申停買宴錢三月除民二年至四年以前稅見時斂重而民不堪

夏四月己未契丹使述括來五月吐渾首領白承福來秋
七月壬午突厥使薛同海來八月壬辰如鄴都開封尹鄭
王重貴留守東京宣徽南院使張從恩東京內外兵馬都
監壬寅大赦甲寅光祿卿張澄使于契丹九月乙亥前安
國軍節度使楊彥詢使于契丹丁丑吐渾使白可久來河
決中都入于沓河冬十月河決滑濮鄆澶州山南東道節

五代史記卷第八
度使安從進反十一月丁丑西京留守高行周為南面軍
前都部署以討之十二月丙戌朔鄭王重貴為廣晉尹徙
封齊王先鋒都指揮使郭海金及安從進戰于唐州敗之
成德軍節度使安重榮反天平軍節度使杜重威為鎮州
行營招討使丙申契丹遣使者來戊戌杜重威及安重榮
戰于宗城敗之

七年春正月丁巳克鎮州安重榮伏誅赦廣晉庚午契丹
使達剌來三月歸德軍節度使安彥威塞決河于滑州閏
月大興蝗食麥夏五月乙巳尊皇太妃劉氏為太后高祖所生
也母六月丙辰吐渾使念醜漢來乙丑皇帝崩于寶昌殿五年

二十

五代史記卷第九

晉本紀九

宋歐陽脩撰 徐無黨註

出帝父敬儒高祖兄也為唐莊宗騎將早卒高祖以其子重貴為子高祖六子五皆早死而重睿幼故重貴得立重貴少而謹厚善騎射高祖使博士王震教以禮記久之不能通太義謂震曰此非我家事也高祖為契丹所立謀以一子留守太原契丹使盡出諸子自擇之指重貴曰此眼大者可也遂拜金紫光祿大夫行太原尹北京留守知河東節度事天福二年九月召拜左金吾衛上將軍三年冬為開封尹封鄭王加太尉同中書門下平章事六年高祖

幸鄴留守東京已而為廣晉尹徙封齊王七年六月乙丑

高祖崩皇帝即位于柩前庚午使右驍衛將軍石德超以

御馬二撲祭于相州之西山禮也如京師使李仁廓使于

契丹契丹使梅李來丙子馮道為大行皇帝山陵使門下

侍郎竇貞固為副太常卿崔柁為禮儀使戶部侍郎呂琦

為鹵簿使御史中丞王易簡為儀仗使舊史實錄無橋道頌

漢高祖亦然已卯四方館使朱崇節右金吾衛大將軍梁言使

于契丹秋七月壬辰皇祖母劉氏崩輟視朝三日高祖所生

時尊為皇太后矣其崩也喪葬不用后禮見恩禮之薄不書曰皇太后帝為祖母也曰崩正其名也丁酉使石德

超撲馬于相州之西山前已備見庚子大赦甲辰契丹使通

事來八月戊午高行周克襄州安從進自焚死庚申天平軍

節度使景延廣義成軍節度使李守貞彰德軍節度使郭

謹進錢粟助作山陵甲子契丹使郎五來庚午葬皇祖母

於魏縣癸酉契丹使其客省使張九思來九月辛卯李貞

貞為大行皇帝山陵都部署冬十月己未契丹使舍利來

庚午回鶻遣使者來十一月契丹使大卿來庚寅葬聖文

章武孝皇帝于顯陵陵在河南壽安縣五代之亂至此七君而不得其死者五明宗雖善終而愍帝不克

葬至廢帝時始克葬故皆不書至此已亥牛羊使董殷使于

契丹庚子祔高祖神主于太廟辛丑蠲高祖靈車所過民

租之半十二月庚午北京留守劉知遠進百頭穹廬穹廬夷狄

契丹于越使令骨支來辛未又使野里已來丙子于

也之用契丹于越使令骨支來辛未又使野里已來丙子于

閩使都督劉再昇來沙州曹元深瓜州曹元忠皆遣使附

再昇以來旱蝗八年春正月契丹于越使烏多奧來三月

壬子景延廣為御營使己未如東京赦廣晉府囚庚申次

澶州赦囚乙丑至自鄴都庚午寒食望祭顯陵于南莊焚

御衣紙錢焚衣望祭之類皆閭巷人之事也用之天子見禮樂壞甚三月己卯朔趙瑩罷晉

昌軍節度使桑維翰為侍中辛丑引進使太府卿孟承誨

使于契丹蝗夏四月庚午董殷使于契丹供奉官張福率

威順軍捕蝗于陳州五月泰寧軍節度使安審信捕蝗于

中都丁亥追封皇伯敬儒為宋王癸卯馮道罷甲辰以蝗

旱大赦六月庚戌祭蝗于臯門癸亥供奉官七人率奉國

軍捕蝗于京畿辛未括借民粟殺藏粟者秋七月甲午冊

皇太后丁酉射于南莊契丹使梅里等來甲辰供奉官李

漢超率奉國軍捕蝗于京畿八月丁未朔募民捕蝗易以

粟辛亥檢民青苗九月戊寅尊奉國夫人安氏為皇太妃

丙申幸大年莊及景延廣第冬十月戊申立馮氏為皇后

馮氏於帝為叔母壬子畋于近郊沙臺丙寅契丹使通事劉胤來

庚午括借民粟十一月己卯董殷使于契丹甲申幸八角

閱馬牧乙未契丹使梅里來戊戌齊州刺史楊承祚奔于

青州辛丑高麗使其廣評侍郎金仁逢來十二月癸丑給

事中邊光範登州刺史郭彥威使于契丹甲寅高麗使太
相來平盧軍節度使楊光遠反淄州刺史程進宗死之開
運元年春正月甲戌朔契丹寇滄州己卯陷貝州庚辰歸
德軍節度使高行周為北面行營都部署契丹入鴈門寇
代州辛巳殿直王班使于契丹至于鄴都不得進而復自

高祖以父事契丹甚謹而歲時遣使舊史實錄皆不書至出帝
立使者旁午不絕不可勝數故其官卑者皆畧而不書班以不

得進故書大饑壬午前靜難軍節度使李同留守東京景延廣

為御營使乙酉北征丙戌契丹寇黎陽辛卯講武于澶州
契丹屯于元城趙延壽寇南樂甲午劉知遠為幽州道行
營招討使括馬丙申契丹寇黎陽辛丑劉知遠及契丹偉

王戰于秀容敗之博州刺史周儒叛降于契丹二月戊申
前軍都虞候李守貞及契丹戰于馬家渡敗之癸丑北面
行營都虞候馬全節及契丹戰于北平敗之三月癸酉及

契丹戰于戚城契丹去

戰而兩各傷失收兵徐去
晉不能追故以自去為文

己丑冀州刺史

白從暉及契丹戰于衡水敗之癸巳籍民為武定軍夏四
月契丹陷德州泚河巡檢使梁進敗之取德州甲寅至自
澶州赦京師己未馬全節及契丹戰于定豐敗之辛酉率
借民財五月戊戌李守貞討楊光遠丁亥鄴都留守張從
恩為貝州行營都部署辛卯李守貞為青州行營都部署
六月克淄州丙午復置樞密使丁未侍中桑維翰為中書

令充樞密使丙辰河決滑州環梁山入于汶濟秋七月辛未朔大赦改元己丑太子太傅劉昫守司空兼門下侍郎同中書門下平章事八月辛丑朔劉知遠為北面行營都統順德軍節度使杜威為都招討使戊辰旌表陳州項城民史仁詡門閭九月丙子契丹寇遂城樂壽代州刺史白文珂及契丹戰于七里烽敗之冬十月庚戌武寧軍節度使趙在禮為北面行營副都統鄴都留守馬全節為招討使十二月己亥朔射兔于臯門丁巳楊承勳囚其父光遠以降殺之出帝已許其不死既而命李守貞自殺之故不書伏誅閏月乙酉德音赦青州囚契丹寇恒州

二年春正月契丹陷秦州壬子馬全節及契丹戰于榆林兩軍皆潰戊午幸南莊張從恩留守東都辛酉高行周為御營使乙丑北征契丹去二月己巳幸黎陽橫海軍節度使田武為東北面行營都部署以備契丹日以備契丹嫌契丹已去而命將

丙子大閱于戚城丙戌閱馬于鐵丘丙申端明殿學士尚書戶部侍郎馮玉為戶部尚書樞密使三月戊戌契丹陷祁州刺史沈斌死之丁未畋于戚城庚戌馬全節克秦州辛亥易州戍將孫方諫及契丹諧里戰于狼山敗之甲寅杜威克滿城乙卯克遂城庚申杜威及契丹戰于陽城敗之追奔至于衛村又敗之夏四月戊寅勞旋于戚地己卯

勞旋于王莽河甲申至自澶州赦左右軍囚庚寅大賞軍
功五月丙申朔大赦丙午幸南莊六月丁卯射于繁臺幸
杜威第旱秋八月甲子朔廢二舞丙寅和凝罷馮玉為中
書侍郎同中書門下平章事辛未閱馬于茂澤陂丁丑括
馬九月己亥閱馬于萬龍岡幸李守貞第冬十月丁丑高
麗使其廣評侍郎韓玄珪禮賓卿金廉等來戊寅射兔于
硯臺戊子高麗使其兵部侍郎劉宗規內軍卿朴藝言來
十一月戊戌封王武為高麗國王己巳射兔于臯門幸沙
臺十二月丁丑臘畋于郊丁亥桑維翰罷開封尹趙瑩為
中書令李崧守侍中樞密使

三年春二月丙子回鶻使突厥陸來壬午射鴨于板橋幸
南莊夏六月孫方諫以狼山叛附于契丹丙寅契丹寇邊
己丑李守貞為行營都部署義成軍節度使皇甫遇為副
河決漁池大饑群盜起秋七月大雨水河決揚劉朝城武
德八月辛酉河溢歷亭九月河決澶滑懷州辛丑行營馬
軍排陣使張彥澤及契丹戰于新興敗之癸卯劉知遠及
契丹戰于朔州敗之大雨霖河決臨黃冬十月河決衛州
丙寅河決原武辛未杜威為北面行營都招討使李守貞
為兵馬都監十一月永靜軍節度使梁漢璋及契丹戰于
瀛州敗績契丹寇鎮定十二月己未杜威軍于中渡壬戌

奉國都指揮使王清及契丹戰于濬沱敗績死之

戰將歿於陣守

將歿於城也不善死者以其志未可知也或欲走而不得或欲降杜而未暇遽以被殺爾若不走不降而死節明者自書死如清是已

威李守貞張彥澤以其軍叛降于契丹庚午射免于沙臺

壬申張彥澤犯京師殺開封尹棨維翰契丹滅晉

出帝雖存而晉

則亡已故書滅

嗚呼余書封子重貴為鄭王又書追封皇伯敬儒為宋王

者豈無意哉禮兄弟之子猶子也重貴子可矣敬儒出帝

父也書曰皇伯者何哉出帝立不以正而絕其所生也蓋

出帝於高祖得為子而不得為後者高祖自有子也方高

祖疾病抱其子重貴寘於馮道懷中而託之出帝豈得立

邪晉之大臣既違禮廢命而立之以謂出帝為高祖子則

得立為敬儒子則不得立於是深諱其所生而絕之以欺

天下為真高祖子也禮曰為人後者為其父母服使高祖

無子出帝得為後而立以正則不待絕其所生以為欺也

故余書曰追封皇伯敬儒為宋王者以見其立不以正而

滅絕天性臣其父而爵之以欺天下也

五代史記卷第九

五代史記卷第九

五代史記卷第十

五代史記卷第十

漢本紀十

宋歐陽脩撰 徐無黨註

高祖睿文聖武昭肅孝皇帝姓劉氏初名知遠其先沙陀部人也其後世居太原知遠弱不好弄嚴重寡言面紫色目多白睛凜如也與晉高祖俱事明宗為偏將明宗及梁人戰德勝晉高祖馬甲斷梁兵幾及知遠以所乘之馬授之復取高祖馬殺而還高祖德之高祖留守北京以知遠為押衙潞王從珂反愍帝出奔高祖自鎮州朝京師遇愍帝于衛州止傳舍知遠遣勇士石敢袖鐵槌侍高祖以虞變高祖與愍帝議事未決左右欲兵之知遠擁高祖入室

敢與左右格鬪而死知遠即率兵盡殺愍帝左右留帝傳
舍而去廢帝入立高祖復鎮河東已而有隙高祖將舉兵
知遠與桑維翰密為高祖謀畫贊成之高祖即位於太原
以知遠為侍衛親軍都虞候領保義軍節度使契丹耶律
德光送高祖至潞州臨決指知遠曰此都軍甚操刺世俗謂勇
猛為操刺錄其本語無大故勿弃之天福二年遷侍衛馬步軍都指
揮使領忠武軍節度使已而以杜重威代知遠領忠武徙
知遠領歸德知遠耻與重威同制杜門不出高祖怒欲罷
其兵職宰相趙瑩以為不可高祖乃遣端明殿學士和凝
就第宣諭知遠乃受命五年徙鄴都留守九月朝京師高

祖幸其第六年拜河東節度使北京留守七年高祖崩知
遠從高祖起太原有佐命功自出帝立與契丹絕盟用兵
北方常疑知遠勲位已高幸晉多故而有異志每優尊之
拜中書令封太原王幽州道行營招討使又拜北面行營
都統開運二年四月封北平王三年五月加守太尉然王
未嘗出兵契丹寇澶州別遣偉王攻鴈門敗之秀容

月殺吐渾白承福族取其貨鉅萬良馬數千四年契丹
犯京師出帝北遷王遣牙將王峻奉表契丹耶律德光呼
之為兒賜以木柅一木柅虜法貴之如中國凡杖非優大
臣不可得峻持柅歸虜人望之皆避道峻還為王言契丹

必不能有中國乃議建國二月戊辰河東行軍司馬張彥威等上牋勸進辛未皇帝即位稱天福十二年天福晉高祖年號也

天福止八年改元開運至此四年矣漢雖建國而未有國號又稱晉年號捨開運而追續天福為十二年初無義理但書其實爾慈

州賊首梁暉取相州來歸變來降曰來歸哀斯人也是時天下無主得其主則往歸之與乎叛于彼

而來於此者異矣漢高祖非有德之君惶惶斯人之無所歸者猶得而歸也故曰歸武節都指揮使史弘

肇取代州殺其刺史王暉晉州將藥可儔殺其守將駱從

朗及括錢使諫議大夫趙熙來歸辛巳陝州留後趙暉潞

州留後王守恩來歸三月丙戌朔蠲河東雜稅辛卯延州

軍亂逐其節度使周密壬辰丹州指揮使高彥詢以其州

來歸壬寅契丹遜聞漢起太原畏而去攻與自去異其文遜者退避之稱以其將蕭翰為

宣武軍節度使守汴州夏四月己未右都押衙楊邠為樞

密使蕃漢兵馬都孔目官郭威權樞密副使契丹陷相州

殺梁暉癸亥立魏國夫人李氏為皇后甲子河東節度判

官蘇逢吉觀察推官蘇禹珪為中書侍郎同中書門下平

章事乙丑侍衛親軍步軍都指揮使史弘肇取潞州戊辰

奉國指揮使武行德以河陽來歸史弘肇取澤州丙子契

丹耶律德光卒于欒城契丹入于鎮州五月甲午太原尹

劉崇為北京留守丙申如東京蕭翰遜歸于契丹以郇國

公李從益知南朝軍國事戊申次絳州刺史李從朗來歸

六月丙辰次河陽殺李從益及其母于京師甲子至自太

原戊辰改國號漢高祖初建國無國號蓋其制詔皆無明文故闕不書然稱天福十二年則國仍號晉可知但無明據故慎於所疑爾此書改國號漢則未改之前宜有所稱則可以推知也赦罪人蠲民稅于闐遣

使者來是夏劉昫薨秋閏七月乙丑禁造契丹服噐天雄軍節度使杜重威反杜重威於晉出帝時避出帝名去重字至漢而復之天平軍節度使

高行周為鄴都行營都部署以討之庚辰追尊祖考為皇帝妣為皇后高祖湍謚曰明元廟號文祖祖妣李氏謚曰

明貞曾祖昂謚曰恭僖廟號德祖祖妣楊氏謚曰恭惠祖僕謚曰昭憲廟號翼祖祖妣李氏謚曰昭穆考典謚曰章

聖廟號顯祖妣安氏謚曰章懿以漢高皇帝為高祖光武皇帝為世祖皆不祧八月護聖指揮使白再榮逐契丹以

鎮州來歸丙申安國軍節度使薛懷讓殺契丹之將劉鐸

入于邢州九月甲戌吏部尚書竇貞固守司空兼門下侍郎翰林學士中書舍人李濤為中書侍郎同中書門下平

章事庚辰北征冬十月甲申次韋城赦河北十一月壬申杜重威降十二月癸巳至自鄴都乾祐元年春正月乙卯

大赦改元己未更名高丁丑皇帝崩于萬歲殿年五十四隱帝高祖第二子承佑也高祖即位拜右衛上將軍大內

都點檢魏王承訓長而賢高祖愛之方屬以為嗣承訓薨高祖不豫悲哀疾劇乃以承祐屬諸將相宰相蘇逢吉曰

皇子承佑未封王請亟封之未及封而高祖崩祕不發喪

殺杜重威

乾佑元年二月辛巳封承佑周王是日皇帝即位于柩前
壬辰右衛大將軍鳳翔巡檢使王景崇及蜀人戰于大散
關敗之癸巳大赦三月壬戌竇貞固為大行皇帝山陵使
吏部侍郎段布堯為副太常卿張昭為禮儀使兵部侍郎
盧價為鹵簿使御史中丞邊蔚為儀仗使丁丑李濤罷護
國軍節度使李守貞反陷潼關夏四月辛巳陝州兵馬都
監王玉克潼關壬午永興軍將趙思綰叛附于李守貞客
省使王峻帥師屯于關西峻不命為將又不令討賊但令揚邠以兵實關西下文乃見命將

為中書侍郎兼吏部尚書同中書門下平章事郭威為樞

密使鎮寧軍節度使郭從義為永興軍兵馬都部署戊子
保義軍節度使白文珂為河中兵馬都部署河決原武五
月己未回鶻遣使者來乙亥魏州內黃民武進妻一產三
男子河決滑州魚池旱蝗秋七月戊申朔彰德軍節度使
王繼弘殺其判官張易鸚鵡食蝗丙辰禁捕鸚鵡庚申郭
威同中書門下平章事癸亥契丹鄭州刺史王彥徽來奔
庚午殺成德軍副使張鵬乙亥王景崇叛附于李守貞八
月壬午郭威討李守貞九月西面行營都虞候尚弘遷及
趙思綰戰敗績冬十月甲申吐蕃使斯漫篤蘭氍藥斯來
十一月甲寅殺太子太傅李崧滅其族壬申葬睿文聖武

昭肅孝皇帝于睿陵在河南考城縣十二月己卯彰武軍節度使

高允權殺太子太師致仕劉景巖

二年隱帝即位至此宜改元而不改元且周顯德二年注而帝名承佑年名乾祐舉國臣民共稱而不改避當時莫大之失本紀無

譏者但書其實後世自見也春正月乙巳朔赦囚二月丙子蠲民紐配

租夏五月李守貞之將周光遜降乙丑趙思綰降六月辛

卯回鶻首領楊彥珣來西涼府遣使者來蝗秋七月丁巳

郭威殺華州留後趙思綰于京兆甲子克河中守貞自焚死故不書伏誅

八月郭從義殺前永興巡檢喬守溫丙戌郭威使來獻俘

冬十月契丹寇趙魏群臣進添都馬契丹陷内丘己丑郭

威及宣徽南院使王峻伐契丹十一月契丹遯

三年春正月西面行營都部署趙暉克鳳翔景崇自焚死故不書伏誅

丙午郭威進添都馬壬子趙暉獻馘二月甲戌旌表穎

州汝陰民麴溫門閭三月己酉寒食望祭于南御園夏四

月壬午郭威以樞密使為天雄軍節度使六月癸卯河決

原武秋八月達靺來附冬十一月丙子殺楊邠及侍衛親

軍都指揮使史弘肇三司使王章皆滅其族郭威反庚辰

義成軍節度使宋延渥叛附于威壬午威犯封丘泰寧軍

節度使慕容彥超軍于七里店癸未勞軍于北郊甲申勞

軍于劉子陂慕容彥超及郭威戰敗績開封尹侯益叛降

于郭威郭允明反乙酉皇帝崩年二十周廣順元年葬之許州陽翟縣號潁陵為賊所葬故不

書蘇逢吉自殺漢亡自隱帝崩後四十二日周太祖始即位而斷自帝崩書漢亡者見帝崩而漢已亡矣其太
后臨朝湘陰公嗣立皆周所假託非誠實所以破其姦故書曰漢亡見周之立速也遲而難於自立則猶有自媿之心焉

嗚呼人君即位稱元年常事亦古不以為重也孔子未修春秋其前固已如此雖暴君昏主妄庸之史其記事先後

遠近莫不以歲月一二數之乃理之自然也其謂一為元亦未嘗有法蓋古人之語爾古謂歲之一月亦不云一而曰正月國語言六呂曰元間大呂周易

列六爻曰初九大抵古人言數多不云一不獨謂年為元也及後世曲學之士始謂孔子書

元年為春秋大法遂以改元為重事自漢以後又名年以建元而正偽紛雜稱號遂多不勝其紀也五代亂世也其事無法而不合於理者多矣皆不足道也至其年號乖錯

以惑後世則不可以不明初梁太祖以乾化二年遇殺明年末帝已誅友珪黜其鳳曆之號復稱乾化二年尚為有

說至漢高祖建國黜晉出帝開運四年復稱天福十二年者何哉蓋以其愛憎之私爾方出帝時漢高祖居太原常

憤憤下視晉而晉亦陽優禮之幸而未見其隙及契丹滅晉漢未嘗有赴難之意出帝已北遷方陽以兵聲言追之

至土門而還及其即位改元而黜開運之號則其用心可知矣蓋其於出帝無復君臣之義而幸福以為利者其素

志也可勝歎哉夫所謂有諸中必形於外者其見於是乎
五代史記卷第十

五
行
變
第
十

漢
本
第
十

六
七



